

Maki Naña Pa Ke Pan
LE YU LALA
Naña Amlelaga
Visayuena Na Tusi Nene

Suniena plas na tusi nini

Yaru naña siri maki nini, naga siri pano pa pegas tai kiena li nalelagaena lala naña asuña añal ke pog mārera lala e kiela maliena, komin yaru la naña pe amlelaga re poli asuña akawela ke amio la. Pelaga naña yaru la akawela manene amio la sanene, kila sane añal mārera, a lavis aligan kiela lelagaena e Yesu Kristo. Ana yaru nene pisa panila sape monar asuñalu mārera e kiela lelagaena lala. Naga pisa panila sape Yesu Kristo ga pe yaru wo naña pisa meraravan Ntewa pan ita. Ana na visa meraravanen suri nene, naga pisayu suri telu.

Suri na sumo, naga pisayu sape Yesu naga pe narina Ntewa kemua lelaga naña suña vano vano tařatete řisi pogos tai. Pe lelaga naña naga pe narina Ntewa rui, ana naga mēna suña řikeyon kinasinen řelaga nene na logearen Ntewa, e sur la naña kila naga mloge piowa e tasnena. Ana komin naña naga pe narina Ntewa, naga mon la metavan navisawalena lala, pona navisi lala, pona Mosis mēnaga.

Suri na lua, Ntewa pisawal rui sape Yesu, naga pe řarin yaru wa naña naga mon manene metava naña suña vano vano tařatete řisi pogos

tai. Naga pe þarin yaru wa naþa taulu make þarin yaru wa na sumo lala.

A suri na telu, e yuþaena kiena Yesu naþa naga pe þarin yaru wa na mon manene metava, naga maren natamaliaen yeririna makega, þarplan kiela milamulena viowa lala, kila la pe amarau re si poli, a mla malena naþa ve uro re panila. Na kuþaþaena nasumo lala, la ape totou na kuþaþaena ga naþa Yesu Kristo kila.

E marana na keviu lualima taaga pa taaga, yaru naþa siri maki nini naga pisayu yaru laþasa e Tusi Marua naþa amlelaga mārera e Ntewa. A naga pisa pa la naþa naga siri maki nini panila, sape popon ataveve malena kiena la nene, vena akilia asuþalu mārera silaga, vano vano-o tol luwasnen kiela maliena. A silaga, monar akira avisu Yesu, vena akilia ava awarpoyo e pog mārera lala, naþa asuþa atol ke e yaru la naþa asuþa akila ke mārera panila paþisi. A na kilamakeen kiena visena, naga pis ruru pan kiena yaru lala, pisa panila sape monar avisuar ruru kiela maliena lala.

Komþasnen tusi la na nini

Visena þesa. Kristo kila meraravan Ntewa panita 1:1-3

Kristo naga mon laa metavan navisi lala 1:4—2:18

Kristo naga mon laa metavan Mosis amio Yosua 3:1—4:13

Kristo naga mo laa metavan þarin yaru wa lala 4:14—7:28

Naviranarena viu naga mon laa metavan naviranarena marua 8:1—9:28

Kuṣaṣaena naṣa Kristo kila naga mon laa metavan kuṣaṣaena marua lala 10:1-31
 Pelaga na lelagaena naga po paṣisi 11:1—12:29
 Visena la naṣa kila yaru la asuṃalu ṃarera, a visena maro 13:1-25

Yesu na mon la metavan li navisawalena lala

¹ Kiau erau le Yu lala, nakonua konua la rui Ntewa pisawal kiena visena yam mokliu pa kieta yermarua lala, e mrapa la moki a e ṣelaga wo la naṣa peve taṣena, pimi molue kome kiena navisawalena lala. ² Ana nanagane, e legiena maro la naṣa tesike e ne, naga pis mesmes nena pan ita pimi kome Narina Yesu. Narina ne nane nanua sumo, e nasiien yomarava, Ntewa miyuṃae kome naga, lalua amliganar make pog a yo lala, a siraunia, Ntewa pisirlua Narina nena, mligan sur punu ga sike e limana, naga pe ṣarun la. ³ Narina nene, naurarena kiena ne Ntewa tego e kiena malena, sane kus nena marana ne Ntewa veraga, pe totou na ṣelaga kiena ne Ntewa. A naṃareraena na kiena visena ṃarera paṣisi, naga ga ṣuarar sur make ga na yomarava nini, a yo taṣena ṃena lala su ruru suṃa ga. A naga ke narui naga taṃan naga pimi kilavan make kieta mlamulen viowa lala, a pogos naṣa kila make ruru kiena yuṃaena nene e yomarava nini, ṣasuṣe si pa ma e peni, pa to metava e lepas nen Arimana na ṣamarua, Parin Suṣe nae ma e peni.

Yesu na mon la metavan navisi lala

⁴ Yesu totano e nene sanene, naga mon manene la metavan navisi la naṣa asike ne, komin

kia naþa naga þaria vanon kiena yuþaena, po manene la taulu kiela kia. ⁵ Visae tevisu e Siriena Wa lala, visena moki naþa sike ea naþa asape Ntewa kila Narina mon manene la metavan navisi lala. E visena la ta nene, Ntewa pis pa kiena Navisaarena nena, sape

“Ko na, nepisu sane þane opim ope naruu nenaga, a nepim nepe Arimoþa kemua lelaga.”
Yauena 2:7

A ta sina pisa mþena sanini, sape

“Yoko in na neim neve Arimana, a yoko naga ve naruu.” *Sam2 7:14*

Visena lua nene, Ntewa pe pisa re nena pa kiena navisi la ta poli, sape pe Narina Wa, ana pisa ga pa Yesu. ⁶ A visen si tai, pisayu pogos naþa Ntewa sinenan sape ligan narina mþearu nene imi e yomarava, ana pisape

“Popon navisi make ga alotunia.” *Naw 32:43*

⁷ E lepas kiena ne navisi lala, la akila yuþaena wo la mokliu, ana Visena Wa pisayu la, sape

“Navisi kiena ne Ntewa lala aþar kiena visena, asa ga lagi, amiyuþae kiena ne Ntewa, asa ga kapi.” *Yauena 104:4*

⁸ Ana pogos naþa Visena Wa pisayu Narina ne Ntewa, sape naga mon manene la metavan navisi lala, pisayuia sane naga maran taaga sa ke Ntewa, pio naga Ntewa. Pisayu naga, sape

“O Ntewa, kioþa lele wa na totanoena naga mon lue ga na mþeke ne. Plaki na kioþa nasuþenena, naga þelaga wo ke narui.

⁹ *Ko okekaran manene la þelaga naþa po, ana yepmavin visuen þelaga viowa, ana kioþa Ntewa na mava naga mligan ko opa*

metava, opa manene la metava otaulu kioṃa erau lala, kila ko okekara keviu sa naṓa miyowauia ruru ko e ponotaninu wo tai.”

Yauena 45:6-7

¹⁰ A e visen si tai, tepisu naṓa Ntewa na mava pio Narina sape Suṓe, a pisayu pupia sur kerkeviu la naṓa naga sii la, sape

“Suṓe, ko ke narui ko opisirlua purṓes nen yomarava, lumoṃa ga miyuṃaen sinapane ma metava.

¹¹ Ana sur la nene, yoko amenunu makea, akokovio, ana yoko ko na osike osike lue.

¹² Sane takue marua tai, yoko osulowar la owar plan la nenaga, a sane moṃa kulsota marua tai, yoko oyenlua nenaga, ana yoko ko na ove urviu maran ve taaga silaga, a kioṃa kas la taṓatete ṓisi pogos tai.”

Yauena 102:25-27

¹³ A visen kiena ne Ntewa taṓena si sike ga wa, naṓa pe pisali re pa navisi tai poli wa, ana pisa ga pa Narina naga taaga, sape

“Ototano e lepasneu na ṓamarua, otoṃa sanene, vano-o yoko neligan kioṃa nasinekar lala aim ave takue na vilanvanen laṃa ea.”

Yauena 110:1

¹⁴ Nane visena maro e lepas nene narui, naṓa pisayu sanape naṓa navisi kiena ne Ntewa lala la na amiyuṃae kiena ga, la ape ninuna na waren kiena visena, a ape naiila itaena vena tetol natamaliaena, ana yaru tai sike ga wa naga mon metavan la make ga, nane Narina Wa ne nane Yesu, naṓa Ntewa pis maro pan ita ea.

2

Nalologena wo viu kiena ne Yesu mon la metavan navisaluaena marua kiena Mosis

¹ Sanene, visena wo lelaga nalologena wo la naña temloge pa narui, monar tesitom urmi manene e la, monar touarar ruru m̄arera. Visae peraga, tevisuaria saṗisi korur yan plan ita si vetania.

² E lepas nen navisaluaena marua nasumo lala, navisi ga la aṗar pimi, ana kana visena ne lala amesmes ga, a am̄arera paṗisi. Ana na kilaroen kana visena make ga, a kana nalogeluen make ga, kana nakoena ruru napo sike ṗa rui. ³ Ana nanagane, nalologena wo viu pimi tol ita ṗa rui, a naga keviu taulu manene navisaluaena marua nasumo. Sanene, visae tesitom korenan mrapa na kieta natamaliaena naña sike ea, yoko taṗatete nena toure vetan kana nakoena nena-a ṗisa. Kieta Suṗe ke narui naga kila ṗesan lologena wo pimi m̄alivi, a la naña amloge pisawal e kiligala, la apisawal liluen pimi pan ita, akila merarava van ita apisape lelaga. ⁴ A Ntewa m̄ena miila naga e visena nene, naña naga kila kile lala, a sur nailanen lala, a yuṁaena lala na kiena nam̄areraena, a metavania, naga kiakian plan nalaena lala kiena ne Ninuna Wa pan ita ai naña naga sitom sape la vania. Ana tepisu sur la nene, tekilia tesape lologena wo kiena ne Yesu Kristo naga pe visena tai naña naga po manenea taulu kieta navisaluaena marua ita le Yu lala.

Yesu ve Suṗe e yomarava naña yoko imi na wa

⁵ Tekilia tesape Yesu naga mon la metavan navisi lala, komin naþa e lepas na yomarava naþa pimi ke ne, yoko Ntewa taþatete ligan navisi la ave suþenia, ana mligan sike vatanon Narina. ⁶ Sur nene Tus Marua mñena pisa, e visen tai kiena ne Þarin Suþe Tepet naþa pisa pa Ntewa, sape

“?Sur wo ya na sike e yaru, naþa kila ositom manene naga sanene?

?Pona ya ne kila omñalivi ke e narina ne yeririna?

⁷ *Nanua, omligan naga sike tanon navisi lala, ana nanene na yam plas la ga,*

a nanagane, opisirlua si naga rui. Omligan naga metava e yo wo tai amio kana pupia naurarena a nawarwarena nena,

⁸ *ana omligan sur make ga sike vatanon kiena namareraena.”* *Yauena 8:4-6*

Ana pogos naþa Ntewa kila yaru ve þarun sur make ga, kila sane pe sur re nena tai naþa naga pe pe suþen re poli. Naga kila sane sape ve sanene, ana pimi tol nanagane, pe tepisu make re sur la e yomarava nini poli wa e kilamarata pa mapin sa naþa Ntewa sinenania. ⁹ Sur la pere wa, ana silaga tekira tepisu ga Yesu, naþa Ntewa pisirlua naga pa mon manene la metava. Nanua sumo Ntewa sinen miye ita paþisi, ana kila Yesu pito tano yam plas la ga, kila naga patanon navisi lala, a kila naga þar manene pupia naloge viowaena na namarewoitaena, ana siraunia, pisirlua sina, paia ruruia amio naurarena nae peni.

Yesu pe kieta natamaliaena, pe kieta þarin yar wa

10 Pelaga na yumãena kiena ne Ntewa na tamaliaitaena nene naga mesmesu, komin naga sii sur make ga, a sur make ga pe naga kiena, ana sinenan sape taulu maran si pupia pegas nen narina la tai vetan yomarava nini, aim si ave kiena. Naga sinenan sape kila sanene, ana nakilaena na m̃arera paṽisi, ana m̃al mrapa taaga ga nakilaena, naga sanini: mrapa naloge viowaena kiena ne Yesu, naṽa Ntewa kila ga naga pimi pe yeririna, naga pe yar natepoen yom̃arua vena taulu kieta natamaliaena. 11 Yesu kilia sumon ita sanene komin naga ke narui naṽa kila ita temekiki, kila narui naga kekaran naṽa pisu ita sane tepe mratava taaga ga temio. 12 Visena telu e lepas nene apisa sanini. Tai sike e tus kiena ne Yauena lala, sane Yesu pis pa Ntewa, sape

“Yoko nevisawal ruru kioṽa kia va wolai lala, yoko neieluar ko likan yeririna lala.”
Yauena 22:22

13 Ta sina, pisawal naṽa Yesu mlelaga e Ntewa sa ke naṽa temlelaga e naga, visena naṽa sike e tus kiena ne Navisawalena Aisea, sape

“In ke narui, naṽa kiau nawasineena, nemligan sike e naga.” *Ais 8:17*

Namaro, visena si tai kiena ne Aisea, pisayu Yesu amio wenla lala, sape

“Nane in ke nane nesike nini narui, nemio narina ne Ntewa taṽena lala naṽa naga mligan la e lum̃au.” *Ais 8:18*

14 Ana ita narina ne Ntewa la nini, ita make ga tepe yeririna, temio tasneta a kata kuruta, ana naṽa Yesu imi ve wenla kemua lelaga e ita,

naga pimi e yomarava nini, naga tasnena a kana kuruta sa ke ga ita. Sanene, pogos naña tamñan si naga mare wo ita, ana kiena marena nene m̃elua puryukawaena kiena ne p̃arin suḡe na m̃areraena na marena, nane Yermare. ¹⁵ Naga m̃elua m̃areraena kiena ne Yermare, mluḡar plan kilika lala naña aḡanaria kararkare ruru ita nenaga, sane maraunen marena naña temloge viowagania e kieta malena wetelu. ¹⁶ Lelaga naḡane, yuḡaena wo na iilaena kiena ne Yesu, pe kila re pa navisi nae ma e peni la poli, ana kila ke ga pan ita na yomarava nini. Visena la mokliu apisa visena sanini, asape

*“Naga suḡa miila ruru ke lus kiena ne yermarua
Epraam lala.”* *Ais 41:8-9*

¹⁷ Nane sitomena kiena ne Ntewa sanene. Naga pisu sane Yesu monar imi sane ita wenla lala e sur make ga, vano-o kilia kilia ruru ita, kilia sinen ye ita. Ana tekilia towasinea, sa naña yoko naga masisun yuḡaena naña yoko naga kila va Ntewa komin kieta mlamulen viowa lala, naña kila kieta marawo temio Ntewa, sane pe kieta Parin Yar Wa. ¹⁸ Naga pisu pupia nakilaliena pimi m̃alivin kiena malena, mloge piowagan pano-o tauluia, ana kila naga kilia iila ruru ita sina e pogos naña nakilaliena imi m̃arera m̃ena ga van ita.

3

Yesu mon la metavan yermarua Mosis

¹ Wolai a vineu wa lala, naña amlogear navioena nae peni rui, nepisa pan amiu rui

nesape Yesu kilia iila ruru ita, ana nenagane nomãareran amiu, sineun nesape popon asitomyu manene naga va laa sane wa, sane naga pe nalologena a naga pe ãarin yar wa na kieta nalelagaena. ² Tevisu veve ruru li Yesu amio yermarua Mosis nanua. Yermarua Mosis nanua sumo, naga masisun kiena yumãena la pañisi e mratava mãana ne Ntewa, a Yesu mēna masisun yumãena la pañisi naña Ntewa pisirlua naga sape naga yumãenia. ³ La ga luwoka amasisun yumãena, ana Ntewa pisirlua Yesu pa manene la metavan Mosis, komin naña sane Mosis naga sike ga loyuma mãana ne Ntewa, kila ke kana narin yumãena ne lala, ana pupia yumãena na visirluaen yuma nena, Yesu ga kila.

⁴ Yuma make ga, monar yar tai naña yumãenia, ana Yesu ke narui naga miyumaen yuma mãana Ntewa, ana Ntewa naga pe ãarun yumãena nene. ⁵ Sanene, Mosis naga pe yar na yumãena, masisun ruru kiena yumãena make ga loyuma e mratava mãana Ntewa, pano tol naña naga pe yar na visawalen pupia visen kiena ne Ntewa lala naña apisawal liluen ke pimi tol nanagane, ⁶ ana Kristo naga kila pa manene la sane, komin naga masisun visuaren pupia yumãena make ga na yuma nene, sane naga pe mearu na pupia kana ãar nena.

?A yuma nene na pisa ke ya ne, pona pisa ke ai? Sumã pisa ita ke ga ne, komin visae ve temarau re, a visae tekekan kiena navisaaren lala, touarar ruru kieta nawasineena e la, ita teve kiena namratava wa ruru nena lala.

Yesu mon la metavan Mosis, a monar telelaga manene va la sane taulu la naña Mosis sumon la

7 Visena ta teke e Siriena Wa, naña pe visena kiena ne Ninuna Wa na kilañpege itaena, naña pisa sanini, sape

“Pane, visae aloge pulgon Ntewa,

8 pe pon re si kiamiu sitomena la imi si m̃arera poli, sa naña kiamiu yermarua la akila rui.

Nanua sumo, e yomema, asike e pog na kilalien tai pañisi, asuñã pano-o asuñal ke sina ga akila ãarila.

9 Ana Ntewa pisu la, pisa sanini, sape

Nayalena kena la nene naña tol kas lualima yam vari ne, nesike nemio la silaga, apisu kiau naiilaena wo la pan la, ana ãelaga kien la nene na kilali in pañisi.

10 Kiela ãarm̃arera kila sineu pikirara pañisi, ana nepisu sane peraga, la nene na, silaga asuñã apa e nene apa e nene amiyepe ke petan kiau mrapa mesmes lala.

11 Sineu maren la ne sanene narui, sineu kar la pañisi, ana nesuñalu narui, nepisaar pan la nesape purvanua wo navaruruena naña nekila ruru suñate la nesape ve kiela, yoko ve ava re si loyuñã ea.” Yauena 95:7-11

12 Wolai a vineu lala, komin sur ne la nanene, popon kam na avisuar ruru amiu. Pe pon re visae amiu yar tai, sitomen viowa sike e naga, pona sinena ve lelaga re si narui, kila naña naga werelua si naga vetan malena wo kiena ne Ntewa mali. 13 Pe sinetan re ita yar tai loru sanene poli, ana monar tela visena naiilaaren

van ita silaga e legiena punu ga, vena ve ita yar re tai naña p̄elaga na mlamulen viowa la visa kotalia kare re naga vano-o naga manin nenaga. Visena naña meta ne sape “P̄ane, visae aloge pulgon Ntewa,” ana naga pe visena nasumo tai, ana suñal suña ga, pulgona pio ke na wa, tesike e kana legiena na logearen la na wa. ¹⁴ Popon touarar kieta lelagaena m̄arera ve sa nena ga naña temlelaga p̄esan ea, popon tesuñal m̄arera tesuña vano-o tol luasa. Ana visae tekila ve sanene, yoko temio Kristo, teve yar na war viraviranan naurarena wo lala kiena ne Ntewa. ¹⁵ Lelaga nañane-e, Visena Wa naña metava pisa sanene, sape pe pon re si sinemiũ la im m̄arera poli, sa naña yermarua lala akila e pogos na kilaliena lala e yomema, naña asumãlu akawe visena kiena Mosis.

¹⁶ ?Ana la ne akila p̄ar m̄arera sanene, a la nene? La naña akila sanene, la naña akekaran amlogear p̄esan pulgona Ntewa, p̄is narui apatanon kiela yar keviu yerkawa Mosis, naga sumon la apetan Isip. Naga sumon la amolue petan yo nene ana pe yam piavi re poli, akawe ke sina naga. ¹⁷ ?A la naña akilali Ntewa, amiyuyur sinena e kas lualima yam vari nene e kiela nayalorena, pano-o sinen kar manene la la, la ke nene na wa? Ee, la naña akila sanene, la ke ga nene na wa, naña naga tamalia la, ana siraunia akila luen ga mlamulena piowa e marana, pano naga kila amarmare ga, puryula la sutetai kar ga sike e yomema. ¹⁸ ?A la naña naga pisaar sape yoko la tañatete ava loyũña e kiena purvanua wo tanea navaruruena naña kila ruru sape ve

kiela, la ape yeririna la ne sanape? La naĉa taĉatete ava ea, naga la naĉa akilakila ke ĉarila, naĉa pe amlogear re sur ta poli. ¹⁹ ?A ya ne kila narui taĉatete ava loyuma e yo wo na varuruena nene? Taĉatete avavini vanon pe amlelaga re e Ntewa poli, a pe aĉasine re naga poli.

4

Navaruruena wa kiena ne yeririna lala kiena ne Ntewa

¹ Nanua sumo, Ntewa kila ruru tanea yo na varuruena tai kiena ne kieta yermarua lala, ana nanagane mena ga kila ruru si kieta yo wo na varuruen rui. Nasiena tere nene naga mal ruru ga sike na wa, ana pe pon re teve sa yermarua la nene poli, naĉa akilalu kiela navaruruena nene, la moki naĉa pe apa re loyuma e poli. Peraga, popon ita tevisu ruru ita yo, pe pon re naĉa vano-o ĉisi na ita laĉasa, la mena akilalu kiela pulmas, Ntewa visu veve ruru la sa ĉisi ve ava atol re kiela navaruruena. ² Naga nene komin naĉa ita maran taaga ga sane yermarua la nene, naĉa lologena wo kiena ne Ntewa tol ita, sa naĉa tol la, ana akila sa naĉa amloge, ana pe amla re si lelagaena to metavan poli. Pe amla ruru re si kana visena la nene e kiela malena la poli, ĉisi pe ĉar re mras e la poli. ³ Ana e lepas kiena ne la nini naĉa pe amlelaga re sanene poli, Ntewa pis marera rui, pisa visena naĉa nesiri metava yam tai rui. Visena nene, pisape

“La nene akila sineu kar la paĉisi,

*ana nepisaar nesape yoko la tařatete akilia atol
kiau navaruruena nene.” Yauena 95:11*

Ana ita nařa temlelaga kemua e lelaga, navaruruena nene naga pe kieta nařa teva loyuńa ea.

Navaruruena kiena ne Ntewa nene, naga kila ruru pe kieta su nakonua rui, komin e pogos nasiiena, naga miyuńae pano-o tol kana legiena orai ana řisi nena ga, ⁴ ana sa nařa Visena Wa pisa e yo lařasa, sape e kana legiena olua, naga pa ruru e kiena yuńaena ne lala, pe miyuńaen re si sur la nene poli.

⁵ Ana sur si tai, visena na metava pisayu nařa Ntewa pisape yoko yar lařasa tařatete nena atol kiena navaruruena, ⁶ ana visena nene kila meraravan sape sane monar yar si lařas asike koyo tai nařa yoko Ntewa tańan la ava loyuńa. La nanua sumo, amloge lologena wo kiena ne Ntewa amio purvanua wo nařa pisaar pisape ve kiela, ana pe asuńal re ĩarera poli, pe amlogear re poli, ana akila pal ruru nena ga, pe apa re loyuńa e poli. ⁷ Ana kieta navaruruena sike na wa sike ne, a Ntewa pisaar kana legiena na tolena, komin kas mok řaro rui, řarin Suře Tepet pisawal visena la nařa sike meta rui, nařa pisa sanini sape

*“Nanagane visae aloge pulgona, pe pon re kiamiu
sitomena la imi ĩarera si poli.” Yauena
95:7,8*

Popon tevisu kilale sane “nanagane” nařa pisa e nini, nane kieta pogos ne nanini narui, nařa Ntewa kila ruruia vena tetol natamaliaena.

⁸ Asitomyuli yermarua Yosua nanua. Naga

sumon kieta yermarua la komþasa apa loyuma e purvanua wo naþa Ntewa pisaaria, ana visae naga ke narui navaruruena kiena ne Ntewa naþa akus rui, yoko Ntewa taþatete si visayu pogos taþena tai va Tepet, visave pe legiena na vaen loyuma e kiena navaruruena. ⁹ Ana peraga, naga suma pisa ke pisape navaruruena wa nowo tai sike ga wa kiena ne kiena yeririna lala, ¹⁰ ana visae a naþa va loyuma ea, yoko wo naþa wo vana vaþisi, yoko naga kilia va ruru e kiena yumaena make ga, sa ke ga naþa Ntewa mena pa ruru e kiena.

¹¹ Visae sanene, popon tomãraran li naþa tetol navaruruena wa nowo nene, ana pe pon re mena ita yar tai ve logear re Ntewa, yoko kilapalia.

Visena kiena ne Ntewa po paþisi

¹² Tesike vatanon visena kiena ne Ntewa, vanon kiena visena naga mali, miyuma e ke marera paþisi, kilia yur malena kien yaru, mal paþisi taulu playu na mara naþa mal lepas luwoka. Visena kiena ne Ntewa kilia va warpoyo va loyuma e losineta, kilia va lipere sur ya naþa teke e kieta sitomena, pona visuveve ya naþa teke e ninuta. ¹³ Lelaga, naga naþa yoko visuveve kieta malena, kilamarana tol make suria, taþatete ita yar tai tapolounia.

Yesu pe kieta þarin yaru wa

¹⁴ Ntewa kilia make sur la ne lepas na e ita, ana potena pania naþa narina, pupia þarin kieta yaru wa naþa Yesu, naga mligan yo nini pa yalen silau ma e kiena yo ma metava e peni, pa kila

ruru si mara wo pan Ntewa vanon ita. Ana vanon naña kila ruru ita ke temio Ntewa sanene, popon touarar nalelagaena m̃arera ea, a popon ve teligan li re si naga pogos tai. ¹⁵ Kieta p̃arin yar wa nene, naga pe yar ta naña pe mninue re kieta ursuen la poli, ana kilia ruru po pañisi naña ita pe tesuñal re m̃arera poli. Naga sinen miye ita, yoko iila ita, komin nanua naga m̃ena ga, natañaliena lala apim ke e naga m̃arera pañisi pania e lepas punu ga, sa ke ga naña apim ke e ita. Naga sa ga ita, ana sur ga tai, natañaliena pe p̃ere re nena naga mloru e mlamulena viowa poli. ¹⁶ Visae ve sanene, tepisu sane toñal kieta mrapa narui vena tekilali naña telen ita teva la lavis pun lele natotanoena wa kiena ne Ntewa, naña pe purp̃es nen lemamiena. Ve temarau re sina, tekekaran naña teim puna Ntewa, ana yoko tekilia tetol kiena sineyeena e kieta malena, yoko tevisu naña kiena nasinewoena iila ita e pog m̃arera ya naña tesike ea.

5

Yesu pe p̃arin yar wa na sineyeen yar lala

¹ La naña apuarar yuñena na p̃arin yar wa, apisiriplan la petan li wa tañena lala vena kilaen yuñena na sanene narui. Yaru naña pe p̃arin yaru wa, naga suñalu su likan yeririna lala a Ntewa, vena warena kiela nalaena lala amio nakuñapaena lala vania, vena naga kilia viewo kiela mlamulena viowa lala. ² Parin yaru wa nene pisu kilale ruru naña yar la asuñã amiyuñae piowa ga, asuñã amiyepe ga petan

mrapa, komin naña naga mña pe kumpui ga, naga mña kilia malum, kila sane sinena kilia ye ruru nena yeririna taña lala, naga moñau ruru nena pan la. ³ Naga sa ga yeririna taña lala, ana pogos naña kila nakuñañaena lala, monar kila ve vanon re ga mlamulena kiena ne yeririna lala, ana vanon mña kiena mlamulena viowa lala. ⁴ Komin sur ne nanene, pe pon re yar tai ligandar si naga poli visave popon imi ve ãarin yaru wa, ana Ntewa ga kilia ligandar yaru vena war pupia kia na sanene, sa naña naga mligandar yermarua Eron nanua sumo pe kieta ãarin yaru wa ãesa.

⁵ A e lepas kiena Kristo, sa ke mña nene. Naga pe kieta pupia ãarin yaru wa, ana naga pe pisirlua re naga pa metava sape naga sanene poli, ana Ntewa ga pisirlua naga. Visena kiena ne Ntewa naña pisa sanene sike e nasiriena wa na sumo lala, naña ta pisa sanini, sape

*“Ko na nepisu sane ãane opim ope naruu nenaga,
a in na nepim nepe arimoña kemua lelaga.”*

Yauena 2:7

⁶ Taña, pisa sanini, sape

*“In na nemligan ko sane yermarua Malkusteke,
ko na yaru wa maro e kiena lus, naña yoko
ouarar ña yuñaena nene vano-o ve uro re.”*

Yauena 110:4

⁷ Ntewa mligan yuñaena nene pa Yesu, ana tepisu e pogos na kiena malena e yomarava nini, naga kila ke pa rui. Sila ga naga sitom manene yomarava nini pañisi, ana tagin pa

Ntewa, wamarana mlau vanonia. Naga suñalar ñarera sike e Ntewa sape visae kiena malena kovio, yoko Ntewa kila malia sina, ana naga ñareran la sane naña mlenwo itania.

Ana Ntewa pisu ñelaga wo na momãuena a navatanoena kiena ne Yesu, ana sinena myea, mloge kiena naviunena lala. ⁸ Lelaga naña Yesu naga pe narina ne Ntewa rui, ana Ntewa tamãan naloge viowaena na pogos ñarera lala pimi pania, sape vian Yesu vena tol ruru ñelaga na lo-gearena e kiena malena. ⁹⁻¹⁰ Naga patanon make nasinenanena lala kiena ne arimana, pano-o kila make yumãena la naña Ntewa mla pania, kila narui pisirlua naga sane yermarua Malkusteke. Sanene, Yesu pimi pe Ntewa kiena ñarin yaru wa, pim pe purþes nen malena naña ve uro re kieta ita punu ga naña temlogearia.

Popon teimi temarua ruru wo e Kristo

¹¹ Ana kia naña Malkusteke, kiena suniena marua wo la sike ne, naña akilia akila meraravan ruru van amiu sanape e yar nene amio kiena yumãena. Mareran navisayu ruruen merarava van amiu, komin naña yam tai sa naña kiligamiu poþe towe la sane. Ana visae kam na asitom asape aloge kilalelia, ¹² yoko wo vaþisi, komin naña kam na amlelaga nakonua rui, ana atorokin naña aim ave navianena na visena wa kiena ne Ntewa rui. Ana peraga, asumã ga sa ga nene, ana monar avian amiu si ea, siar si e kana purþes nen visena ne lala.

!Lelaga naña, kam na nakanen kinanen m̃arera la rui, ana sa ga naña asum̃a sinemiun ke amun yu na wa! ¹³ La naña amun ke yu sanene wa ape sisi ke ga wa, ana tařatete ave manmarua e visena na mrapa lelaga, ¹⁴ ana la naña akan ke kinanen m̃arera, la amarua ruru rui. La ne sanene, kiela sitomena la miyum̃ae ruru pano-o apisu veve ruru make sur punu ga, ana akapur apimi po tol naña apisu kilale ruru sur ya naña po a sur ya naña piowa.

6

Popon tevisuar ita ve towasuře re si teva varau

¹ Komin sitomena la nene, popon teligan řelaga na sisi sike na, teva re laa sane wa e navianena m̃arera kiena ne Kristo na atorokin sitomena naña marua.

Tepilopu ita e kieta yum̃aena piowa namarena la rui, tetol naviawaena e Ntewa rui, ana popon ve tesum̃a teva re si ea. Naga sa naña tekilavan lelen yum̃a rui, pe pogos na visirluaen narui. ² Apian ita e nakeena rui, apu řarita rui, temlelaga rui tesape yoko tesum̃al si e marena, a tekilia rui naliřereena ta sike ne amio kana nakoaena nena naña yar viowa la akus vano-o tařatete řisi pogos tai. Sur la nene tořaro make e rui, ana pe pon re tesum̃a teteteliv m̃aga e sur la nene silaga poli, ana popon tesum̃a teva re laa sane temio kieta Suře. ³ Sur nene m̃arera pařisi, ana visae Ntewa tam̃an ga van ita, yoko tekilia teyum̃aen wo ga. ⁴ Lelaga, yoko tekilali naña teva

re laa ga wa temio naga silaga, ana sanapen la naña amloru, apa si varau rui?

La nene, la amial ruru ñes e yomerarava asuñña akinan ke e lokove nae ma e peni rui, a Ninuna Wa pimi mñaena e la, a pogos naña apa si apiowa sanene, yoko tañatete si avilopu la awasuñe aim e malena. ⁵ Visena Wa kiena ne Ntewa miila la e kiela malena rui, a atol towe mña namareraena na suñenena naña pimi ke ne, ⁶ ana pogos naña apilopu si mñasila, akila ñarila sanene, yoko aim awo si sanape? Peraga, yoko viowa van la vañisi, komin naña akila ke sane asuar ke si Narina ne Ntewa meta e lak torovia, sa naña asuñña apisirilua ke naga e maran yar lala vena aviuelin kare si kiena kia.

⁷ Asitomyuli na nene. Porotano naña mun yua naña mloloru ea, ana ñar manene kinanen kan la naña amiyuñae ke ea, ana Ntewa kekaran pañisi, kiena navisa ruruena sike ea. ⁸ Ana porotano naña pe ñar re sur wo poli, ñar ga vilumñini viowa lala, naga sa ga naña apiain ga maren pania, ana tañatete akila sur wo ta ea, yoko asikap ga narui.

⁹ Erau lala lelaga pañisi, visena la ne sanene amñarera pañisi, ana e lepas na pun amiu, in na pe nesitom re nesape kam na sanene poli. Peraga, noñasine amiu, sane mras nen malena viu naña po kapuru ke e amiu na wa. ¹⁰ In na nemlelaga nesape yoko tañatete Ntewa sinen ñesan kiamiu yuññaena wo lala, a yoko tañatete sitom korenan vinayaena a sineyeena naña kam na akila pania, pogos naña kam na amiila kiena nalelagaena wa tañena lala. Kam na amiyuñae

po sanene, ana kila Ntewa kekaran pañisi, yoko naga mña kila ruruia a kila wo van amiu.

¹¹ Sanene, nesape neiilaar amiu sina, vena ve ava re si varau, kam na añaaran ava re laa ga wa, ava mña atol ga luas rui, vena akilia atol sur punu ga naña kiamiu sitomena sike ea. ¹² Kam na ve ave yowen re, ve yepemiu malum re, ana monar avesinaia e yuñaena maran ve taaga sa ke kieta yermarua wo la naña amasusun ruru yuñaena, kiela sitomena la piayavi pano-o atol sur punu ga la naña Ntewa pisaar pñesan pan la.

Visaarena kiena ne Ntewa pe lelaga pañisi

¹³ Navisaarena ta naña Ntewa kila, naga kila pa yermarua Epraam, pisaar mñarera pania e lepas na lus la naña yoko amolue raunia. Pe kia tañena re si naña Ntewa kilia visa vena kila kiena navisaarena nene mñarera poli, komin kiena kia naga mon metavan make kia tañena lala, ana Ntewa pisaar ke sina e ga e kiena kia, sape

¹⁴ *“In na Ntewa, yoko nevisa ruru ko ve keviu vañisi, nekila kionña lus la aim ave moki vañisi e yomarava nini.”*

¹⁵ Ana Epraam lavisi sitom pñele visena nene, ana pisu naña Ntewa kila kiena navisaarena nene mñarera ruru po pañisi, ana pe sur koren ga naña Epraam tol pogos mñarera la mok pañisi, ana pe mligan re navisaarena nene poli, pñarar ruru mña pano-o pisu naña siar tol ya naña Ntewa pisaar pania.

¹⁶ E lepas na pñelaga nakilaen navisaarena mñarera, yar la asumña apisa kia kiena yar wa tai pona sur wa tai. Ana pogos naña yar tañena

la aloge, la monar alelaga ea, tařatete si avisin sinekar vania, komin kia nařa apisa kila visena řarera.

17 Ana sanapen Ntewa? Naga řena sinenan sape kila kiena visena van ita řarera ruruia, vena telelaga ea, ve tesitom řele re. Ita na sane narina lala na waren kiena lalimana, ana naga sinenan sape tekiliaar ruru tesape kiena sitomena wo nařa teke e ita tařatete řisi pogos tai, ana kila kiena navisaarena pan ita řarera pařisi.

18 Navisaarena kiena ne Ntewa nařa pan ita řarera ruru sanene rui, komin naga pe pisokan li re poglis tai poli wa, kiena visena tařatete vilovilopu karea, ana metavan kiena navisaaren nene, pisa si amio kiena kia wa, vena kilaen kiena visena nene řarera nenaga. Ana sur lua nene, kiena navisaarena amio kiena kia, lalua amiyuřae lele taaga vena kila ita tesuřal řarera tese kiena visena. Ita topur matan yo viowa nařa tesu řes ea, takalewele ke yo na suvanena, ana navisaarena lala kiena ne Ntewa akila kieta sitomena la piayavi ruru po. Sanene yoko tekilia teva tetol ruru yo wo nařa Ntewa kila ruruia a mligan sike e marata woga ga nařa.

19 Kieta nalelagaena řarera nene, nařa tesape yoko Yesu tamalia ita, naga sitomen ta nařa sane kilavaru na tararen waa. Yoko řarar ruru kieta malena, vena ve sur re si ta nařa kilia werelua ita, vano-o tol pogos nařa teva varaun pupia kulmrae loyuřa e Yo Wa nařa pe Yo Wa pařisi. E yo nene teva tesuřal nena tese marana ne

Ntewa, yoko kieta sitomena lala akilia añarera ruru ke na wa asape woga ga van ita.

²⁰ Naga nene komin naña Yesu sumon ita pa e yo wa nene rui, pa kila kiena yumãena sane kieta ãarin yar wa, vena kila kieta mara wo temio Ntewa.

Sa naña tepisa rui, naga sane pe ãarin yar wa maro na lus kiena ne yermarua yaru wa Malkusteke, ana naga pul plan kieta mlamulen viowa la rui, a yoko kila mña kiena yumãena na sanene vanon ita vano-o taãatete ãisi pogos tai.

7

Malkusteke na sumo naga mon la metavan make ãarin yar wa taãena lala

¹ ?Ana yermarua Malkusteke nene, naga ai, a kana suniena naga pa sanape? Tus naña Nasiarena pisayuia, pisape naga pe yar na pogos kiena ne Epraam nanua sumo, pe ãarin suãe na kumali marua wa naña Salem, a naga pe pupia yar wa kiena ne Ntewa na mava. Ana pogos tai, yermarua Epraam pa kila mara pa kiena nasinekar lala, naña ãarin suãe taãena lala, ana taulu la, ãasuãe ke si narui, pitawe Malkusteke kinae patanonia, ana Malkusteke pisa ruruia. ² Ana Epraam mla nalaena pania, mlalua lualima petan ponotia na sur make la naña taulu e pogos na mara naña ãarar ke sape wasuãe si va mña. Pupia yar wa nene naga pe yar tai, sa naña kiena kia ga luwoka apisa. Kiena kia ães nena, Malkusteke, kana kinasa pisape “ãarin suãe na mesmesu,” a kiena kia na lua

pisa sanini, sape “Parin suŕe na suŕare,” komin naga pe  arin suŕe nae pulkumali naŕa Salem, naŕa kana kinasnena na suŕare. ³ Yar nene, kana suniena nena pe taŕena ga, komin naŕa pe temloge re apisape kiena yermarua lalua na sanape, pona aŕa repina lala la ape lus nae pe wa. La pe apisawal re kiena maliena poli asape aŕa siar sanape, a pe suniena na kiena marena re poli. !Sa naŕa naga pe mare re nena poli, suŕa  uarar ke kiena yuŕaena na wa! Sanene, naga sa ga narina ga Ntewa narui, naŕa yoko naga ve kieta yar wa  a vano-o taŕatete  isi pog tai. ⁴ Komin sur la nene, tepisu e visena marua kiena ne Ntewa naŕa kia na Malkusteke, naga pe kia tai naŕa pa metava paŕisi, pano-o tol repita yermarua Epraam, naŕa asitom ke asape naga mon la metava rui, naga  ena patanonia,  ar nawaren pania e kom as nen sur la naŕa taulu e mara.

⁵ Ana  elaga na laen nawarena na sanene, naga  elaga ta naŕa navisaluaena pisape le Israel lala la monar akila luen ga. Kiela yar wa lala na lus kiena ne Livae, la monar avisuar ruru la, awarplan lualima petan ponotia e kiela sur make ga van la, komin la na sa ga namratava taaga, naŕa ape lus kiena ne Epraam. ⁶ Ana Malkusteke neŕe, naga pe nae re mratava puna ne yermarua Epraam poli, ana Epraam pisu kilalea sape naga yaru wa tai, mli ere nawarena kom as pania. Yermarua Epraam nena naŕa Ntewa pisaar sur wo la pania, ana naga patanon Malkusteke.

Ana pogos naŕa Malkusteke tol nalaena nene, kekara, pisa ruru Epraam, a nanene kila mer-

aravan si pan ita sane naga mon manene la metavana, ⁷ komin yar naña torokin visa ruru yar tañena, naga monar mon laa metavan yar nene. ⁸ Ana Malkusteke amio yar wa tañena la nene, la make ga atol kiela nalaen la torok ga, ana la ape tañenan sur tai. Suri nene sanene, sape yaru wa lala añar kiela, ana siraunia amarmare, ana Malkusteke mla kiena, asape naga sumã pano-o pe mare re poli. ⁹ Ana sanaña Malkusteke mon la metavan yermarua Epraam, naga mon mña metavan pupia kia tañena naña Livae. Lelaga kemua, Livae naga pñesan naña pe repina ne lus kiena ne yaru wa lala, ana naga mña ga molue kome lus kiena ne Epraam, ana pogos naña Epraam patanon Malkusteke, mla nalaena pania, sa ga naña Livae mña patanon Malkusteke mla nalaena pania. ¹⁰ Suri nene naga sane pogos naña Epraam mñalivin Malkusteke, kila pania, Livae pe paeme re e repina nene poli wa, ana sa ga naña naga mña kila.

Yesu pe molue re e lus kiena ne yaru wa la poli, ana molue ga kome lus viu tai

¹¹ Ana visena la ne ma metava apisawal ke pupia sur ta ne pañisi. Akila meraravan asape Ntewa pñere plan lus na yaru wa lala kiena ne Livae, pisirilua lus tañena tai kiena ne yar wa lala, kus lelena. Yermarua Eron mña pisirlua yumñaena na lus kiena ne yar wa lala, ana Mosis pñar kiena navisaluaena nene pimi mñalivi, ana visae Ntewa visu sane sur lua nene torokin kila ita temesmes ruru nena temio, vera na ligan sumã ga. Ana peraga, naga pilopuia, mligan si

řarin yar wa viu tai pimi mřalivin ita, nařa pe lus kiena ne yermarua tařena nene Malkusteke. ¹² Ana komin Ntewa pisirilua řarin yar wa viu nene, mesmesun mřena nařa visirlua kana navisaluaena viu tai. ¹³ Monar ve sanene, komin e nene naga pisayu kieta Suře, nařa naga mřalivi e lus ta nařa pe la re nena ta suřal se wonta ana kila yuřaena kiena ne yar wa poli. ¹⁴ Lus nařa Yesu mřalivi ea, tekilia tesape naga lus nae Suta, ana pogos nařa Mosis pisawal kia kiena ne lus kiena ne yar wa lala, naga pe pisawal re nena kia nařa Suta poli.

¹⁵ Ana lus na yar wa tařena lala suřa ga, nařa Yesu molue komea, nane lus kiena ne Malkusteke nařa tepisasa ke narui. Sur ne nane kila narui tepisu sane Yesu pe sa re yar wa tařena la poli, ana naga sa nena Malkusteke ne narui.

¹⁶ Tařena la nene, apim ape yar wa komin ga nařa sane ape kana lus na kuruta mal nene, sa nařa navisaluaena marua pisa, ana Yesu pimi pe kieta řarin yar wa e pupia namřareraena na kiena malena nařa tařatete akila karea, nařa sike sike lue narui. ¹⁷ Tekilia tesape naga su lue sanene, komin nařa visena kiena ne Ntewa pisa rui, nařa sape

“In na nemligan ko sane yermarua Malkusteke, ko ope yar wa maro na kiena lusa, nařa yoko ouarar yuřaena vano-o tařatete řisi pogos tai.” *Yauena 110:4*

¹⁸ E nene, pimi merarava ruru pan ita sane Ntewa pilopu kiena mrapa na yuřaena. Mrapa marua naga navisaluaena kiena Mosis na sumo, nařa suřal sukařar pařisi, ana sa nařa kiena

nam̃areraena naga pe torokin re kila sur wo ta van ita poli. ¹⁹ Naga kila p̃ele yon naṓa kila mesmesun ruru ita, ana Ntewa mligan mrapa marua nena sike ga narui, kila si sitomen viu ta pa metava, kus lelana. Mrapa viu nane tekilia telelaga m̃arera tesape naga pe mrapa namalena naṓa pe lelaga, naṓa kilia sumon ita teim lavisin Ntewa.

²⁰ Ana mrapa viu nena, navisaarena kiena ne Ntewa tai kilarar suṃalar m̃arera su lue na sike ne. Yar wa taṓena na sumo lala, poglis naṓa apuarar p̃arila, amiyawawo la vanon kiela yuṃaena, pe navisaarena re tai sanene poli.

²¹ Ana pogos naṓa Ntewa pisirlua Yesu pimi pe kieta p̃arin yar wa, kila amio kiena navisaarena m̃arera tai. Naga sa naṓa visena tai na Tus na Yauena Wa Lala pisa, naṓa sape

“Ntewa pisaar m̃arera rui, ana taṓatete si vilopu kiena visena nene, visave

‘Ko na yoko ouarar yuṃaena sa naṓa p̃arin yar wa kiena ne kiau yeririna lala, vano-o taṓatete oṓisin pogos tai.’ ” *Yauena 110:4*

²² Ana Yesu p̃uarar ruru kiena yuṃaena nena sanene, pe kile na naviranarena viu kiena ne Ntewa amio ita, naṓa po manene la taulu na sumo, a pe nasiaren suri la naṓa Ntewa pisaaria pan ita, yoko kila make ruru nena van ita sirau.

²³ Nanua sumo na yar wa la moki, komin naṓa ta miyuṃae pano-o kovio, taṓena kus lelana, miyuṃae m̃a pano-o, naga m̃ena kovio, la akilakila sanene. La taṓatete asu lue, ²⁴ ana Yesu, naga yoko su lue ga narui, ana yoko naga taaga ga uarar kiena yuṃaena sa naṓa kieta p̃arin

yaru wa vano-o tařatete řisi pog tai. ²⁵ Sanene, naga sike ga e marana ne Ntewa silaga, mlen lue ga pania vanon ita, ana kila sane ita nanagane, pona ita la nařa tepim ke rau wa, ana naga ke narui nařa yoko tamalia make ruru ita punu ga nařa teva tokom puna teim lavisin Ntewa.

Yesu na pe řarin yaru wa nena napo

²⁶ Tekekara pařisi nařa Ntewa pisu sane popon ligan řarin yaru wa ta nařa po manene sanene imin ita. Naga pe yar ta nařa pe yaru wa pařisi, pe napiowaena ta to re nena ea řisa, merarava pařisi, kiena řelaga pe sa re nena yar na kilaen mlamulen viowa la poli, kiena kia pa manene laa to metavan punu ga sur nae peni.

²⁷ Yar wa tařena la nene, la monar akila luen ga kuřařaena na ikikena legiena punu ga. Sumo, monar akila vanon si kiela mlamulena viowa lala, a siraunia, akilia akila vanon mlamulena viowa kiena ne yeririna tařena lala, ana Yesu na pe sa re nene poli. Naga kila kuřařaena na ikikinen mlamulena viowa na yomarava wetelu yam taaga, nanene e pogos nařa kuřařain si tasnena vanon ita.

²⁸ Lelaga kemua nařa navisaluaena marua pimi sumo, ana kiena řarin yar wa pe yar ga, malum ga, ana naviranarena viu nařa pimi marea, kiena řarin yar wa naga mesmes lue ga, nane Yesu narina ne Ntewa.

8

Naviranarena viu: yuřaena kiena ne kiena řarin yar wa naga po manene la

¹ Ana vianen la naña meta ne apisa sur mok liu e lepas na þarin yaru wa lala. Ana pupia purþes nen visena tai suña ga, naña popon tesitom urmi ea, naña pisa sape kieta þarin yaru wa wo tanea ta sike rui. Naga Yesu, naña þasuþe si pa ma e peni, ana Yerkawa Keviu na Yo na Ma Metava mligan naga totano teke e lepas nena na þamarua. ² Naga sike e yo nene, kila ke kiena yuñæna wa lala, sa naña yaru wa la nanua sumo akila lotena e yuñæ kanus wa naña e yo mema. Ana lelen kilaen lotena nene, yar ga la amiyuñænia, ana kieta þarin yaru wa Yesu naga miyuñæe ke loyuñæ e yo na lotena naña po, pe lelaga ruruia, naña Ntewa ga miyuñænia. ³ A þarin yaru wa taþena la nene, kiela yuñæna, silaga apisir plan la vena waren nalaena va Ntewa, a akila kuþaþæna la pania, ana popon teviun tevisave kieta þarin yaru wa nene, pona naga mña mla nalaena pa Ntewa, a kila kuþaþæna pania? ⁴ Visae e ga e yomarava nini, yoko taþatete avisu naga sane yaru wa tai, komin naga pe molue re kome lus kiena ne Livæe poli, naña navisaluaena pialua pan la sape lala ga akilia awar nalaena va Ntewa. Sanene, kieta þarin yaru wa nene suña miyuñæe ke ga e yo wa na ma e peni.

⁵ Yo wa na yomarava nini, amio yuñæna la naña akila ea, naga sa ga kana yanen ga, ana naga naña ma e peni, naga napo nena ga lelaga. Ntewa mña pisa sa ke ga, pisa kilale pa Mosis, ve sanape naña yoko yuñæen yuñæ kanus wa, pisape yoko yuñæen taveve kana nono nena

torokin naþa naga pisuia poglis naþa pa ma e tavie. ⁶ Ana sanene tepisu naþa Yesu kieta þarin yaru wa pe lelaga napo, a kiena yuþaena punuga powo la sane. Naga totano likan ita temio Ntewa, miyuþaen naviranarena viu tai van ita temio naga po manene la sane, naþa sike e navisaarena lala kiena ne Ntewa naþa po laa sane, pano-o tepisu naþa sike ma e yo wa na peni kila yuþaena po manene laa sane. ⁷ Visae naviranarena þes nene naga woga ga rui, vera na taþatete si nalua nena, ana peraga, kila narui nanagane Ntewa pisirlua naviranarena viu amio ita naþa po manene rui.

Naviranarena viu: Ntewa pisaar nanua rui

⁸ Naviranarena naþa na sumo, Ntewa pisu sane pe miyuþae po re poli, pe torokin re kiena sitomen poli wa, ana kila naga pisaar sina na urviu tai. Naga pisawal sanene e visena ta naþa mla pa Navisawalena Seremþaea vena visawalia. E visena nena, Ntewa pisaar sanini, sape

“Ayagogo ruruia. Sineun nesape nevisa van amiu nevisave pogos ta pimi ke ne, naþa yoko nekila naviranarena viu tai nemio amiu kiau yeririna lala, kam na lus kiena ne Suta amio lus nae Israel.

⁹ *Yoko naviranarena nena ve maran taaga re amio naþa nekila nemio kiamiu yermarua la nanua sumo ne. Naviranarena na urmarua nene, naga e pogos naþa sineu mie la, noþere plan la e pogos mþarera gar Isip, ana siraunia, pe asitoþal re si naviranarena*

nene poli, pe amlogear re si poli, kila narui in mēna nepilopu māsuu pan la.

- 10** *Ana nanagane, yoko nevisirilua si naviranarena viu tai nemio si kiamiu lus lala. E naviranarena nene, yoko nekila sanini:*

Yoko neligan ruru kiau navisaluaena lala sike e kiela sitomena lala, yoko nesiri kiau visena la sike e losinela lala, yoko neim neve kiela Ntewa kemua lelaga, a yoko aim ave kiau p̄egas nen yeririna.

- 11** *E pogos nene, taṗatete si akilali naṗa avian la, sane ta kilali naṗa pisawal van nalavis puna, visave ‘Ke, mrapa nanene,’ pona ta pisawal va wenla, visave ‘Ntewa, naga sanene sanene.’*

Peraga, yoko taṗatete si akila ve sanene, komin yoko la punu ga veve taaga avisu kilale inu e kiela malena, siar e la naṗa pe kiela kia re poli, vano-o tol kiela yerkawa ne lala.

- 12** *Nepisaar nesape kiela napiowaena lala, yoko neviewo nena ga, a kiela mlamulen viowa lala, yoko ve nesitoṃal re si na rui.*

Nane kiau naviranarena viu ne nanene narui nemio kiau yeririna lala.” **Ser 31:31-34**

- 13** *Ana e kiena visena nene, Ntewa pisayu naviranarena viu nene, kila ita tepisu kilale sane naga pisu ke kiena naviranarena na sumo nene sane pe urmarua rui. A sitomena ta suṃa ga sane sur naṗa Ntewa pisa ne sape pe urmarua rui, nagane pito la tano narui, ve ve viavi re yoko kovio make nenaga.*

9

Naviranarena vii: kiena lele na lotuena naga po manene la

¹ Ana tekilia ruru po naña sane naviranarena marua, naga kana mrapa lala na kilaen lotena asumã ga, amio mñena kiena lele na kilaen lotena tai, naña sike ga yomarava nini. ² Lele na kilaen lotena nene, naga kana yumã kanus wa nena, naña aþere pupia kulmrae ea, akila þerea sane loyumã lua. Lepas tai, naña apio asape Yo Wa, purþes nen kapi vivaga tai naña kana koruas olua sike ea, amio varvara tai na kilaparavi lualima yam taaga pa lua, naña apio kilaparavi na vianen van Ntewa.

³ A varaun kulmrae nene, lepas þas na vano, naga apio asape Yo Wa naña pe Yo Wa paþisi.

⁴ Loyumã e yo nena, naga kana wonta na ponotaninu nena naña amiyumãen e kol, amio pias nen navisaluaena. Pias nene amiyumãen kana kulusa e kol, yepas na loyumã a vanua, naña e kana loyumã nena, amligan ruru sur telu sike ea. Nasumo, naga pialora naña pe kol, naña kinakinasnen kinanena na yo mema naña asape mñana teke ea, a sur na lua, naga plasgai kiena ne yermarua Aron naña nanua na pitovi, a sur na maro, naga kilavaru lua naña pe lepalepasa naña Ntewa siri kiena navisaluaena sike e la.

⁵ A e wos nen pias nen navisaluaena nene, naga pe keplamarana, naña asape lele na totanoena na sineyeena kiena ne Ntewa. A nono lua na navisi asumãal asike meta ea, naña akian kupela suvivi yo naña naurarena kiena ne Ntewa pitom

ke tano ea. Ana yo wa na lotena naviranarena marua naga kana sur ne la powo pañisi, ana tañatete si tevisa sur ve moki e lepasnela. Ana sur na visaena taaga, tesape yo na lotena nena, amio kana sur ne lala, naga amiyumñaen ga e sur na yomarava la nini, tañatete nena sike sike lue, naga pe po re sane yo na lotena na naviranarena vii poli.

Naviranarena vii: kana nakuñapaena nena naga po manene la

⁶ Sur la ne sike meta ne, nane sur ke la nene narui naña amligan ruru sike loyumña e yumña kanus wa na sumo nanua ne, ana poglis naña yar wa la apa loyumña, amiyumñaen amio la. Ana silaga, apava ke e ga e yo wa naña mon ñesa, ⁷ ana e yo wa na lua naña pe yo wa manenea, yar wa lala pe apa li re nena loyumña e poli. Yo nene yar taaga kilia va loyumña ea, nane kiela ñarin yar wa, a naga pe pa re silaga poli, kilia va ea yam ve taaga ga e kasa. A visae pogos naña vavini, tañatete va koren ga sanene, ana monar taveve kana mrapa ne lala.

Sumon naña vavini, monar kila kuñapaena e sur mal tai, ana monar war piasnen kana kuruta nena va loyumña sane nalaena tai, nanene na e lepas nen kiena mlamulen viowa amio kiena ne yeririna lala. ⁸ Ana pogos naña akila ke sanene, naga sane pe kile na Ninuna Wa naña kila meraravan pan ita sape pog naña visae yumña kanus nene susu mña ke ga wa, vera na ita yar kar la pe kieta mrapa re nena ta poli naña teva toworu e yo naña Ntewa sike ea.

9 Kanus na yumã wa nañani, amio kana kulmrae nena naña telan liþere loyumã, a kana sur ne lala, la na ape sur na konua na ða rui, ana apisa ke pupia sur ta ne pan ita na nagane ne. Akila narui tesumã tepisu kilale tesape nalaena la naña yaru wa lala amlavia pan Ntewa, amio kuþaþaena la naña akila ke ne, akila poga ga, ana sur la nene taþatete kilia kila yeririna la aloge sane kiela sitomena la mekiki ruru nenaga e navisuena kiena ne Ntewa.

10 Akila sur la nene, amio ya la naña narin navisaluaena la apisa, naga nene e lepas na mrapa na yumãenen kinanena amio namunena, a e þelaga na kevanen sur lala. Ana sur la nene ape na yepas nen yar ga na vanua, ana pe atol re losinena pona kiena sitomena poli. Kieta yermarua la apuarar ña þelaga marua na sanene pano-o, ana sur la nene na ve nauarar laen ga vano-o tol pogos naña Ntewa kila kieta mrapa viu, naña kana naviranarena viu nena naña pimi ñaliv rui.

Tana ne Kristo kevan ita mekiki rui

11 Ana pogos naña Kristo pimi ñalivi, naga pimi sane kieta þarin yaru wa, naña pe na þelaga marua re poli, ana pe na mrapa viu, vena kila narui tekilia tetol navisaruruena wa la naña Ntewa mligan ruru sike na. Naga pe pa miyumãe re e yumã wa kanus marua na sumo poli, miyumãe e ta naña po manene la paþisi, pa la metavan nene. Yo wa naña kila ke yumãena ea, pe yar re miyumãen e limana po, a pe su re ñena e yomarava nini poli, sike

nena e yo merarava e marana ne Ntewa nae peni. ¹² Ana pogos naña Kristo pa loyuma e yo wa nene, naga pano pano-o tol nena kana yo wa naña pe yo wa nena napo, ana pa yam taaga ga, pe navaen re si pogos tañena poli. A pogos naña pa loyuma, kuruta naña naga ñaria pe pe kuruta na nane re poli pona kuruta na narin puluk, ana kana kuruta nena napo naña mlau e lak torovia. Ana kurutana sike e marana ne Ntewa sanene, taulu naul luaen kieta mlamulen viowa la, naña tañatete ñis pog tai. ¹³ Monar ve sanene, komin naña e ñelaga marua, visae yar tai kila sur ta viowa, amla narin kuruta na nane pona puluk, amio posnoyavi na narin puluk naña askapia, amla pa e yo wa. Ana e pogos nene asitom asape nalaena na sanene kilia kila yar nene ikiki si e marana ne Ntewa. ¹⁴ Ana visae kuruta na sur mal ga la akila sanene, yoko kuruta kana Kristo naga kilia kila va ve keviu laa sane. Kristo pe yaru wa tai, naga mekiki ruru neña ga, pe kororaki ta to re e poli, ana naga tañan kiena malena vena Ninuna Wa la va Ntewa sane nalaena tai, ana naga pim pe kieta natamaliaena. Sanene, yoko kuruta kana Kristo kilia kila sineta la ikiki, kilia wereplan ita vetan kieta yumaena na marena lala, pisir plan ita vena tekila yumaena lala kiena ne Ntewa mali.

Tana ne Kristo kila naviranarena viu suñalu ñarera

¹⁵ Ana komin naña Yesu kila yumaena wo pan ita sanene, tekilia tevisu naga, sane naga pe yar na waren sur wo lala na viranarena viu imi ñalivi e ita. Nanene naga miyumaen

e kiena marena, naña sane marena ta naña pul plan make maliena kiena ne yeririna lala naña akilaro navisaluaena lala na viranarena nasumo. Ana komin naña naga pul plan ita sanene, kila sane visae ita a naña Ntewa vio ita, tekilia tetol kieta lalimana naña yoko tařatete řis pogos tai. ¹⁶ Visae Yesu ve mare re, tařatete tetol kiena lalimana la nene, ana sa naña sane mare kemua lelaga, navisaarena make ga naña na naviranarena nena apim sane visena maro kiena Yesu, ana sur make ga pimi e limata. ¹⁷ Komin naña visae yar tai visaar maron sur tai sa naña kiena visena maro, ana pogos naña naga mal ke ga wa, apuarar ruru kiena visaarena nene suņa ga, ana pe amiyuņaen re poli suņa pano-o tol pogos naña visae naga mare narui, yoko ayuņaen ga na wa. ¹⁸ Sa ke męna naviranarena naña Ntewa kila řesania, naña visae kuruta na kuřařaena lau, ana visena naviranarena suņalu.

¹⁹ Sur nene Mosis męna kila, naña Ntewa kian kiena navisaluaena la pania ma e tavie, ana pitomi tano pisawal make kana visena ne lala pa yeririna lala, ana pogos naña pisawal make pae, męmomřar nakuřařaena ne lala, vena kila sa naña visena navisaluaena nena amali, a asuņalu. Aņe momřar narin puluk lala a nane la nařani ana naga mla kala narin kuruta ne lala, taron narin wii pito amio, ana mla narin laki tai, apio asape isop, piar vilus nen sipsip naña pivaga pa ea, ana puton pito e kuruta nařani, peven ve tokak ga e tus navisaluaena nena, a peven męna

e yeririna lala, pisawal pan la, sape

²⁰ “Naga nene kuruta na sur mare naña vena kilaen navisaluaena kiena ne Ntewa mali. Ana monar tewatanonia a telogearia.”

²¹ A sa naña peven kuruta nene e la, ana peven mēna ve torokaki e yuñā tapolen nene, amio sur la naña asike loyūñā ea, naña asuñā akila ke kiela lotena amio la.

²² Mrapa na yuñāena la naña na navisaluaena marua nene la sa ke nene narui, naña lavis sur make ga naña amiyūñāe ke amio la, monar aveven kuruta ea vena akila aim ave sur wa silaga. Naga nene sane kila meraravan pupia sur ta ne pañisi van ita, sane visae kuruta ve lau re, mlamulen viowa tañatete aviewoia.

Naviranarena viu: kana kuñapaena ñar plan make ga mlamulena viowa lala na yomerava

²³ Sanene, sur la naña li wa la amiyūñāe ke ea, monar akila mekik lue ga taveve kana narin ñelaga ne lala. Ana yuñā wa kanus nena, amio kana sur ne lala, la ape sur na yomarava ga nini, ana sanapen yo wa naña na lelaga, naña nane Ntewa teke ea ma e peni? ?Naga mēna monar kana kuñapaena na viewoen tai? Ee sanene, naga mēna monar kuruta lau vena kila make kana sur ne la ve sur wa, amio mēna yeririna la naña apa ke ea. Ana kuñapaena na yo wa nae ma e peni, naga pe sa re kuñapaena na sur mal la naña akila ke e yo wa na yomarava nini poli, naga pe kuñapaena tai naña keviu manene la, a po lue ga. ²⁴ A kuruta na kuñapaena nene sike e marana ne Ntewa rui, komin kieta ñarin yaru

wa Kristo ãar pa loyũãa e yo wa rui, naãa pe yo wa re ga naãa yar la amiyũãaen poli, ana yo wa nene yo wa lelaga napo, nane ma e peni. ²⁵ A pogos naãa kila kiena kuãaãaena nena, naga pe sa re naãa ãarin yaru taãena wa la akila ke poli. La akuãaãain ga kuruta na sur mal lala, ana naga kuãaãain ke si na kana kuruta. A silaga apa akila e kana yo wa nena yam taaga e kasa punu ga, la akila luen ga sanene pa ke ne, ana naga kila yam taaga nena ga, pe nakilaen re si pogos tai poli. ²⁶ Visae Yesu monar kila luen ga kiena kuãaãaena nene vanon mlamulen viowa la naãa yeririna la asuãa akila lue ga pa ke na, kana kinasa sane siar e nasiiena na yomarava nini pimi tol nanagane, naga tamalele ga ãeke e lak torovia mloge piowagan naãa kana kuruta mlaue silaga.

Ana e naliganaren naãa Ntewa pisir lua naga pe sa re nene poli. Naga pisu naãa luas nen pog naãa tesike e nanagane pimi ke lavis narui, ana kila Yesu pimi paemen ita mare ga na wa. Naga pimi ãalivin ita, kuãaãain make nena kiena malena, ãene plan ãelaga na mlamulen viowa.

²⁷ E lepas naãa ita yeririna lala, Ntewa kila sape temal e yomarava nini, ana yoko tokovio ea ãisi na temal sina vena teva e naliãereena, ²⁸ a e lepas kiena ne Kristo, naga ãena sa ke ga. Naga pimi ãalivi e yomarava nini, siraunia kuãaãain naga ve na waren kieta nakoena na mlamulen viowa lala, ana yoko naga imi ãaliv si yam ta ne, pe na ulen re si mlamulen viowa poli, ana ve na wereplan ita vetan nakoena na kieta mlamulen

viowa. Sanene, ita toŕasine ke ga naga, tesape monar naga imi tamalia ita.

10

Nakuŕaŕaena kiena ne Yesu naga po la sane

¹ Tesitomyu li si navisaluaena marua kiena ne Mosis. Naga pisa m̃a sur wo laŕasa, ana pe pisawal make re navisaruruen wo naŕa Ntewa sinenan sape Kristo kila imi m̃alivin ita poli, kila sane navisaluaena nene sane pe kulus ga, ana pe kana kinas re napo poli. Navisaluaena marua nena, naga suŃa kila ke ga kana kinakinas la sanene, kana kinas nene sane kiena kuŕaŕaena la naŕa akila silaga, maran taaga ga e kas punu ga, pe atorokin re poli, taŕatete akilavan make la naŕa akila ke lotena amio. ² Visae peraga, vera na la naŕa akila lotena sanene, aim amekiki ruru make wo ŕisi, ve aloge re si sane mlamulen viowa sike e la, ve asitom re si kilaen kuŕaŕaena, ana peraga, akila ke sina ga sanene silaga. ³ Kuŕaŕaena lala, popon naŕa kila naŕa aninu sane pe kiela mlamulen viowa re si poli, ana peraga rui, e kas make ga apisu sane kuŕaŕaena la nene akila sane asitoŃal si kiela napiowaena lala, ana amloge sane kororak na kiela mlamulen viowa sike e la wa pano-o pimi piowa manene la. ⁴ La amninu ke sanene komin naŕa kiela sitomena ta sike na, naŕa asape kuruta na purwolu puluku pona kuruta na nane kilia yumu plan kiela mlamulen viowa sanape ne? Sur nene, asitom ŕele paŕisi, pano-o apisu

sane peraga, aŝi  ele yonia, kiela mlamulena viowa su m a ga.

⁵ Ana komin sur ne la nanene, pogos na a Kristo pitomi m alivin ita e yomarava nini, naga pisawal kiena mrapa viu narui. Naga mla visena tai na a teke e tus na Yauen wa lala, pisa pa Ntewa Arimana, sape

“Ko na pe sinom an re si ku a aena lala amio nalaena lala poli, ana okila ruru tasneu na a yoko netam an van ko.

⁶ *Sur la na a asikap lele ke ne, opisu apiowa ga, a nalaena la nakilaena mlamulen viowa ikiki, pe sinom an re nena ga.*

⁷ *Ana siraunia, nesu alu nepisawal ruru pan ko, nesape*

‘Ntewa in na nekekaran ga nekila ya na a ko sinom ania,

sur ne nanene in na nepitominia, sa ga na a

Tus Marua sape yoko nekila.’ ” Yauena 40:6-8

⁸ Ana popon tevisu ruru visena na a Kristo pisa ne. Sur  es na a pisa, pisa ke ku a aena lala amio nalaena ta ena la na a asum a akilakila ke ne, pe sur korena ga na a navisaluaena sape monar akila, ana Ntewa pe mloge re nena pon la, a pe sinenan re si sape akila poli. ⁹ Siraunia, sur na lua na a Kristo pisa, naga sape tam an naga narui, vena imi kila nasinenanena kiena ne Ntewa.

E nene, tepisu mrapa na sumo na kilaen ku a aena komin mlamulen viowa lala, Ntewa koven lua nena ga, ana kom ga e kiena mrapa na lua. ¹⁰ E mrapa viu ke nanene narui, Yesu Kristo

kila sa naña nasinenanena kiena ne Ntewa pisa, tañan make tasnena wetelu, nane kila narui tepim temekiki a tepe wa e marana ne Ntewa, sike sanene sulue narui.

Kuñapaena kiena ne Yesu naga sulue na sike ne

¹¹ Yar wa la naña asuñã amiyuñãe ke e ãelaga marua, monar la ãas naña e legiena make ga asike e Yo Wa. La asuñã akila ke narin kuñapaena la silaga, naña akila lue ga maran taaga silaga. Kuñapaena la nene akila ke ne komin mlamulen viowa la naña yeririna la akilakila ke na, ana pe atorokin re nena naña akilia awar plan ãelaga na mlamulen viowa petan malena ken yar la poli.

¹² Ana kieta ãarin yaru wa naña Yesu, kiena kuñapaena na pe sa re nene poli. Naga kuñapaen sur taaga ga panon mlamulen viowa make ga, a kila yam taaga ga, ana pogos naña naga kila pae, pa teke metava e yepas nena Ntewa na ãamarua. ¹³ Ntewa pisu Yesu kila ñã sanene, na pisawal pisape yoko war nasinekar kiena Yesu lala, ligan la asike vatanonia sane takue tai naña yoko vilavan lana ea. ¹⁴ Pe yuñãena tañena re si ta naña yoko Yesu monar kila sanene poli, komin naga mla nalaen ãisi rui, naña kana kuruta kila ita temekiki, nanagane tepo rui e marana ne Ntewa, tesu ruru tesu ñã sanene vano-o tañatete ãisi. ¹⁵ Ninuna Wa ñãena miakol visena pan ita e lele nene, e visena ta pimi kome Navisawalena Seremãea. E visena nena, Ntewa pisa sanini sape

16 *“Ana nanagane, yoko nevisirlua si naviranarena viu tai nemio kiau yeririna lala.*

Ser 31:33

E naviranarena nena, yoko nekila sanini: neligan ruru kiau navisaluaena lala sike e kiela sitomena, nesiriar kiau visena lala sike e losinela.”

17 Ntewa pisa pa sanene ana sukol si pa la sane, pisa sanini sape

“Yoko kiela mlamulena viowa lala amio kiela napiowaena lala, tařatete si nesitořalia.”

Ser 31:34

18 Visena nene pisawal ke pupia naviewoena nařa Ntewa kila pan ita rui, ana visae ve sa kemua nene, pe nalaen tařena re si ta nařa tekilia telavia komin naviewoen kieta mlamulen viowa lala pona kieta napiowaena lala, komin nařa Ntewa kila ruru řisi rui.

Ve temaraun re va lavisinen Ntewa

19 Wolai a vineu lala, sa nena nařa visena la nene apisa narui, kuruta kana Yesu pike mratavan ita rui, ana pe pon re si temarau poli, popon tokom ea teva loyuma e Yo Wa nařa Ntewa sike ea. 20 Sumo na pupia kulmrae nene telan mono kieta mrapa, ana pogos nařa tasnena ne Yesu porovia, kulmrae mena nene purřa lepas lua, pietavan kieta mrapa na vaen loyuma. Nanagane tesike e mrapa wo ne narui, nařa pe mrapa viu tai, a pe mrapa na vanonen malena.

21 Ana Yesu kila kieta mrapa navaen loyuma e Yo Wa sanene, naga pimi pe kieta pupia yar wa, nařa naga pisuar make ita ga la nařa na mratava puna ne Ntewa. 22 Kana kuruta war plan kieta

kororak napiowaena la naña sike loyumañan ita, kiena wii merarava kevan tasneta imi mekiki nena ga, ana ve temawa re sina, a tekilia teva loyuma. Tekilia teva lavisin Ntewa naña sineta la ve lelaga, teviawa manene m̃arera e naga tesape yoko ve koven lua ita re, yoko naga worworun ita ga.

²³ Tekilia telelaga ruru tevisave yoko Ntewa kila wo ve sanene van ita, komin naña silaga, naga sum̃a kila nena taveve ya naña naga pisaaria. Ve tesitom ãele re sina, ana touarar ruru yumaena wo navisawalen va yar taña lala sur tanea naña naga kila pan ita. ²⁴ Ana e ke sina ga e lepas na pun ita, popon tesitom ruruia, telual mrapa na yuren kieta sitomena lala vena sineta si manene ita la sane, a vena tekilakila ruru yumaena wo la van ita va laa sane. ²⁵ Pe pon re teligan ãelaga na viranar ruru itaen poli, sa naña yar lañas akila ke rui, ana popon teiilaar ita silaga. Pelaga wo la nene, monar tekila lue ga van ita, a visae tevisu pogos m̃arera na legiena maro la asike lavisu narui, popon towo lue ga van ita sanene va m̃a ga.

Ve tesitom korenan re naliãereena kiena ne Ntewa

²⁶ Popon teviun naviunena e lepas na pan ita naña tetol nakiliaen la e visena lelaga rui. Teviunia tesape visae ve tevisuar ruru ita re, sane tesum̃alun naña tekila ruru ke mlamulena viowa, yoko ve sanapen ita narui? Navisa-taãeena nena, sanini, mlamulen viowa la ne sanene, pe kana kuñañaena re si tai naña yoko

war plan poli. ²⁷ Ya ga naña sike pa rui, nane navisaarena kiena ne Ntewa nalaen nakoarena m̃arera vanonia, amio pupia lelen kapi naña yoko kekan make nena kiena nasinekar lala. Nanene naga pe sur tai naña monar temaraun vañisi. ²⁸ E navisaluaena marua kiena ne Mosis nanua sumo, visae yar tai kilaro kana visena ne tai, a visae yar ve lua pona ve telu avisave lelaga kemua, pe mrapa na sineyeena re si poli, yar nene yoko akilalua kiena malena veraga. ²⁹ Visae akila ve sanene va yar naña kilaro navisaluaena kiena ne Mosis, ana yoko ve sanapen yar naña pilon ke si m̃asina pa Narina ne Ntewa? Yoko naga kiena nakoarena ve keviu manene laa na wa, komin naña naga ãarnena kare kuruta naña naviranarena viu naña kila naga mekik rui e marana ne Ntewa. Yoko Ninuna na lemamiena loge viowagan ãelaga nene vañisi, sinen kar li yar naña kila na wa. ³⁰ Yoko monar war nakoarena nena, komin Ntewa pisaar sanene ãa rui. Kiena Visena Wa tai sike e Tus na Visaluaena, naña pisa sanini, sape

“Naliñereen mlamulen viowa, naga kiau in ga taaga.

Yoko nelamaran si van la m̃arera na m̃arera vanon kiela naviowaena lala.” Nav 32:35
A e ke e lele nene na wa, visena tañena pisa ke m̃ena ga sanini, sape

“Yoko Ntewa na mava liñere kiena yeririna lala.” Nav 32:36

³¹ Monar tevisuar ruruia, komin yar naña kila mlamulen viowa, pogos naña aligan naga e limana ne Ntewa vena visu vevea, nanene na pe

narin sur re nene poli, naga pe sur namarauen ke nene narui.

Viawaena m̄arera navisuen sur naña yoko imi m̄aliv na wa

³² Temninue kare narui aña yoko ve sanapen legiena la ne pimi ke ne wa, ana popon tesitoñal luen ga mrapa wo la naña Ntewa miila ita ea, e legiena la naña p̄aro pa rui. Nanua pogos na tepim toñaliv e yomerarava, pe piavi re nena poli, tepane pogos m̄arera la pañisi, naña akila piowa manene la pan ita naña temlelaga ke e Yesu. ³³ Pogos la p̄asa, e ga e maran yar lala, akoven visena viowa la pan ita, a pogos tañena lañasa, akilapel ita ga e p̄elaga viowa la naña piowa na piowa manene la. Pogos lañasa, pe akila re pan ita poli ana akila pa kieta erau tañena lala, ana tepa tesuñal tesu temio la, temiila la.

³⁴ Ita lañasa, akoven la apa e yuña nakoena, ana sineta miye la pañisi, tepanon tekilali naña teiila la vena towar plan re kiela pupia naloge viowaen naña apisu e yo nene. A pog tañena si lañasa, la naña sinela kar ita apimin kieta sur lala, añar plan kare petan ita naña tekilalu manene la sur lala. Ana e pogos nene, pe sineta kar la re poli, tetam̄an ga, komin naña nasinekekaren tai sike e ita, sane sur la naña añar plan pavano lala ape na yomarava ga nini, ana kieta sur nowo la naña apowo manenea asike ga wa, naña tañatete akovio pog tai, yoko ave kieta lue narui. ³⁵ Nane kieta pupia naulua itaena nane nanene narui, naña yoko Ntewa la

van ita, ana komin naña nalaena tanea nene sike e marata, pe pon re si tekilapal nakiliaaren m̃arera naña sike e ita poli, ³⁶ ana monar tesuñal ruru nena m̃arera tese Ntewa. Kieta sitomena la monar ve piavi ruruia vena tesuñia tekila ga kiena nasinenanena ne lala, ana tekilia tetol sur la naña naga pisaar pan ita. ³⁷ A pog na tolena, pona ve ve piavi re yo, yoko imi m̃alivin ita, sa naña visena kiena ne Ntewa tai naña navisawalena Añakuk pisawalia, sape

“Yam ve plas la sina, ve ve piavi manene re, ana yerkawa naña yoko imi ne, naga tañatete si su laa sane, yoko imi m̃alivi nenaga.

³⁸ *E pogos nene, kiau yar mesmes lala, yoko amal ruru nenaga, komin naña amlalaga e inu, ana visae nevisu lala yar tai yepen mavin inu, weresu si naga, yoko tañatete nena nekekarania-a ãisa.”* *Aña 2:3-4*

³⁹ Ana pe ita re nene poli. In na pe nesitom re nesape ita yar sur la ne sanene yoko temaraun Ntewa poli. La naña añeresula sanene, yoko monar ava akovio ga narui, ana ita naviawaen m̃arera ea, monar tetol malena.

11

?Naviawaena naga ya ne?

¹ Kieta viawaena nena, yoko tevisave naga sur ya na sanene? Tekilia tevisave naga pe ãelaga na wasine ruruen Ntewa m̃arera, naña kilia kila kieta sitomena kapuru ruru wo e ga e naga, a kilia kila kieta lelagaena m̃arera, tesape sur la naña pe tepisu re poli, ana pe lelaga

naña asuñña ga. ² Viawaena naga pe pupia sur tai pañisi e navisuena kiena ne Ntewa. Siar e repita nasumo lala pimi, mrapa taaga nena nanene naña Ntewa kila sane kilia kekaran yaru. ³ Pelaga naviawaena ne nanene narui kila ita tepisu kilale sane pe lelaga kemua, visena kiena ne Ntewa ga sii make suria, kila kieta yomarava nini pimi m̄alivi. Kiena m̄areraena ne nane mla sur la naña yar tañatete visuia, miyuññaen make sur la naña tepisu sike ea. ⁴ Popon tesitomyu si repita na sumo lañasa, sanape naña la m̄ena apiawa e Ntewa nakonua.

Ta naña naga yermarua Epol. E kiena naviawaena e Ntewa, naga mlotun e nalaena ta naña memes pañisi, ana Ntewa kekarania, naga pisu po manenea taulu nalaena naña wenla naña Ken sinenan sape lavia. Ana Ken sinen mimi, m̄em̄ar wenla nena, ana ðelaga wo naviawaena kiena ne Epol e Ntewa kila Ntewa pisu sane naga pe yar memes tai, a suri nene kilia iila ita ke vim tol nagane na wa.

⁵ Tañena sina, nane yermarua Inok. E kiena naviawaena e Ntewa, naga pe tol re marena poli. Naga pe yermarua, ana Ntewa ga pitomi ðerelua naga, kovio e yomarava nini pa metava, ana akale pano-o pe añal re poli. Ntewa kila sanene pania komin pogos naña sike e yomarava nini, naga pe yar tanea tai naña Ntewa kekaran pañisi.

⁶ Lelaga pañisi, visae naviawaen e Ntewa ve su re e ita, tañatete tekila naña yoko Ntewa kekaran ita. Yar a naña sinenan sape kilia Ntewa e kiena malena, sinenan sape imi lavisinia, naga monar

viawa manene sanini. Naga monar lelaga sane pe lelaga kemua pañisi, Ntewa sumã ga, a monar wasinea sane yoko Ntewa kila wo vañisi va la naña akale ke naga.

⁷ Yermarua si tai naga Noa. E kiena naviawaena e Ntewa, naga kila ya naña pisa pania. Ntewa pisawal pupia womie nene pania, ana pogos naña Noa pe pisu re nena kana kile ta poli wa, ana kila ga ya naña Ntewa pisa pania, kila kiela pupia waa nena vena namratava puna lala akilia amal ea.

Naviawaena kiena ne Noa nene e Ntewa tamalia la nene, kila m̃ena pupia nakoena pimi m̃alivin make yar tañena lala e yomarava, komin naña pe amlelaga re poli. Ana Noa naga pe na ãegas kiena ne nalelagaena lala tai e Ntewa, ana Ntewa kila amesmes e marana.

⁸ Tañena si tai, naga yermarua Epraam. E kiena viawaena e Ntewa, naga mlogear ruru pañisi, molue petan yo naña sike ea, pa e yo tañena tai, naña Ntewa pisaar sape tam̃an vania. Naga mialin ke sape va ea, mninue kare sape am̃a kope ke na wa, ana komin naña Ntewa pio, naga pa ga narui. ⁹ Naga mial m̃a pano-o, pogos naña pa m̃alivi ea, sa ga wolawa ga tai, ana purvanua ke naña Ntewa pisaar pan narui. Ana ãere yuãa tapolen m̃ene yo nena, sike e nene amio na mratava puna lala, sa naña narina lala, naña Aisak lala amio mapina lala naña Sekop lala, naña la m̃ena akus porotano nene naña Ntewa tam̃an pan la ve kiela lue. ¹⁰ Ana Epraam tol yo nene, sike ea, ana pe kila re pupia m̃ana yuãa ta poli, m̃eke ga e yuãa tapolen la

naḗpane. Naga nene komin naga kiliar ruru po paḗisi sape pe m̃ana uḃa re napo nene poli wa, ana naga sukoko ga e nene na wa, vena yoko va e pupia pulkumali kiena ne Ntewa, naḗa Ntewa pisirlua a miyuḃaen amio kana ḗeren m̃arera naḗa taḗatete si wororowa pogos tai.

¹¹ Ta sina, naga sira marua Sera. E kiena naviawaena e Ntewa, naga m̃eḗenan ḗesan narina naḗa Aisak. Nakonua nena, pe ḗarli re sisi poli wa pano-o pimi pe sira marua, ana suḃal m̃arera sike e naḗa sape yoko navisaarena kiena ne Ntewa ve lelaga vania amio wona yermarua Epraam, sape yoko lalua awar narila.

¹² Yermarua Epraam m̃ena ga sa naḗa mrae pito tano rui, ana narina naḗa ḗaria kila namratava puna la apim ape mok paḗisi. Ana siraunia aḗarliluen la apitom sanene, pano-o kiena lus lala apim ape mok sane verue la metava ma e sinapane, taḗatete si aulola, asaga mras nen none la garo losi narui.

¹³ Ana yermarua make la naḗa amlelaga e Ntewa sanene, Ntewa pisaar kiela sur wo lala pan la, ana aḗar ga kana narin kinakinas komḗasa, ana amar tan yomarava nini. Ana akilia asape Ntewa ḗar ligan ga laḗasa sike ga wa, yoko warpo nakeviu sirau, ana kila apisu kilale asape ape wolawa ga e yo nena. ¹⁴ Yomarava nini naga pe kiela yo re nena poli, ana kiela sitomena sike e m̃ala uḃa taḗena naḗa napo. ¹⁵ Ana visae yo naḗa asitom manenea naga purvanua ke naḗa amligan apim, visae la sinelania, akilia avilopu la awasuḗe si ava e wo ga. ¹⁶ Ana peraga, pe kiela

sitomena p̄asuṑe re si pa e nanene poli, la asitom ke asape atol yo taṑena naṑa po manene la sane, sinelan ga uṑa nae ma e peni. Ntewa kila ruru make kiela pulkumali wo nene rui, ana naga sinenan paṑisi sape popon loge avisave naga pe kiela Ntewa kemua lelaga, a naṑa avisave ṑana uṑa, naga ve ṑala uṑa lue narui.

17 Ana e lepas kiena ne yermarua ke la nene na wa, tevisayu si yermarua Epraam, naṑa e kiena nakilaliena ṑarera naṑa naga pisuia. E kiena naviawaena e Ntewa, naga taṑan nena narina taaga naṑa Aisak pania, taṑan sape kuṑaṑain ke sina ga vania. Aisak ke naṑa nanua ne Ntewa pisaar ṑarera pa arimana, sape

18 *“E naruṑa nene, yoko kionṑa*

lus la aim ave moki.”

Jen 21:12

19 Ana pogos naṑa Aisak lavis mare, Epraam pe kiena sitomena re poli e navisaarena kiena ne Ntewa nene, ana naga mlelaga ke naṑa sape visae monar weṑar narina nene mare, Ntewa kilia tamalia si wo ga ne. Ana Ntewa pisu naṑa kiena naviawaena pe lelaga sanene, ana Aisak pe mare re si poli, ana ariman pisu ga naṑa Ntewa mla maran si malena kiena ne narina nene pania mligan e limana.

20 Ana yermarua taṑena si tai, naga narina ne Epraam naṑa Aisak. E kiena naviawaena e Ntewa, mla kiena visena maro pan narina lua nene Sekop amio Esau, mlelaga ṑarera sane yoko sirau navisa ruruena imi van lalua sa ga naṑa pisaar pan la.

²¹ Ana Sekop m̃ena nene sanini, e kiena naviawaena e Ntewa, p̃asine ga naga sane yoko kila wo van kiena lus lelein la naṣa avim sirau. Naga p̃ar narina naṣa Yosop, ana Yosop p̃ar narina la lua. Ana pogos tai, lavis repila marua naṣa Yosop kovio, suṃalun kiena plasgai telan p̃arina pito tano vena lotun Ntewa, p̃isi na pisawal navisaarena navisa ruruena pan mapina la punu ga.

²² Arimala marua nene Yosop, naga m̃ena popon sa tesitoṃalia. E kiena naviawaena e Ntewa, naga mlelaga m̃arera sape Ntewa ve ligan re yeririna nae Israel la asulue Isip, ana yoko wereplan la awasuṣe si e kiela purvanua wawa. Naga pisawal sanene, ana pogos naṣa kiena malena lavis p̃isi, pisa m̃ena sape visae naga mare, ve asin re mon Isip, monar akus vano-o asin m̃ene kiela yo.

²³ Taṣena sina naga yermarua Mosis, kiena yermarua lua. E kiela naviawaena e Ntewa, pe amaraun re navisaluaena m̃arera kiena ne P̃arin Suṣe Pero poli, pogos naṣa narila nane Mosis paeme, apinaia naga paṣisi, pe ataṃan re aṃeṃar poli, ana akuswan naga mon moṃa ga, pano-o tol kupario telu.

²⁴ Ana Mosis nene, naga m̃ena, pogos naṣa kapuru pa keviu pae na, naga m̃ena pe yar na lelagaena. E kiena naviawaena e Ntewa, pe sitom manene re e kia wo naṣa amla pania, sa naṣa P̃arin Suṣe Pero narina naṣa sira, narina, ²⁵ ana naga sitom manene la kiena lus taṣena lala, yeririna na mratava kiena ne Ntewa. Naga

mligan uña mña yar keviu, amio ðelaga la na yomarava nini, naña sane kana kekarena pe na ðane ga ne, ðisi na pa miakol amio kiena yeririna lala e malena na pog mñarera la naña le Isip la akila ke pan la. ²⁶ E pogos nene, naga suña sitom veve ke ga navisaruruena la naña kilia imi mñalivin naga e pogos la naña pimi sirau. Naga mnunun sape visae kus ke naloge viowaena amio la vanon yuñaena kiena ne Navisaarena, naga po manene la taulu naña naga kus ke sur wo lala na malena memee ga e uña mña ne yar keviu nae Isip. ²⁷ E kiena naviawaena e Ntewa, pe maraun re sur ya naña Parin Suþe Pero kilia kila vania, ana naga mligan ga Isip sa naña Ntewa pisa pania. Naga pe pisu re marana ne Ntewa poli, ana ðar yon ga naña logearia sa ga naña pisu nena e kilamarana.

²⁸ Naga ke sina ga, e kiena naviawaena e Ntewa, naga ðuarar ruru mrapa natamaliaena naña Ntewa pisa pania, a naga kila kiena yeririna lala aplan ke kuruta na sipsip e mñala pulutava lala, ana pogos naña Ntewa mligan kiena navisi na marena pitomi vena la nakoena va Pero, war ro ga kom metavan mñala uña lala, pa mñemar mñearu na uña punu ga nae Isip. ²⁹ Ana siraun nanene, yeririna nae Israel la nene aþure matan Pero, amial apa atol Sive naña Pivaga. E kiela naviawaena e Ntewa, akusro pupia sive nene apa lepas þasia, amial ke apano-o sa ga amial ke ga e porotano. Ana la nae Isip asirau apimin la, ana la mña amial asape akusro sa ke ga, ana pupia sive nene pimi pranwo la sina,

kila talilun make la ga amarmare. ³⁰ Ana pogos naña yeririna nae Israel lala amial apa la sane apa atol pupia kumali naña Seriko, amio kiena li na mara la naña asike loyuma e kana pupia kove naña amiyumaen e kilavaru telivi piora. E kiela naviawaena e Ntewa, la nae Israel amial atalivi e kumali nene pano tol legiena orai, pano-o tol legiena na olua, apisu naña Ntewa kila kove la nene amloloru veraga.

³¹ Ana loyuma e kumali nene, sira tai suma ga, naña nanua sumo pe sira na mrapa, kiena kia Reap. Sumon, yar la lua navisu veveen yo kiena ne le Israel lala, la apa atapolou loyuma Seriko, ana pogos naña asike ea, sira nene perewan la e mana yuma, miila la keviu pañisi. Yaru tañena la nae kiena yo, pe sinelan re avatanon Ntewa poli, ana e pogos na mara, amarmare, ana e kiena naviawaena e Ntewa, Reap pe mare re poli, atamalia kiena malena.

³² Nane repita marua la pasia naña ape purpes nen yar naviawaena nakonua. Ana tekilia teva laa sane, vanon kia moki sike ga wa, sane yermarua la nene Kition, Parak, Samsen, Septa, amio Parin Supe Tepet, amio mana Samiuel amio navisawalena tañena lala, ana nepisu sane torok ga wa, pe aora torokin re poli naña nekilia nesiri plan kiela suniena la veve taaga e la punu ga. ³³ Pe lelaga kemua, visae teloge ga sunena la nene na, apo na apo. E kiela naviawaena e Ntewa, kieta yermarua lala akila pupia sur la moki. Yoko tevisu naña akila mara ataulu purvanua marera tañena lala, ana akila naña yeririna na yo viowa lala monar ayuma e ataveve

navisaluaena na po, ana am̃areran na tolen ya naṗa akilia asape Ntewa pisaar pan la. Yeririna taṗena lala akuwanla apito e ṗiliṗili na laion vena akan la, ana pe akan la re poli. ³⁴ Akuan la e pupia kapi, ana taṗatete nena kekan la. Pogos laṗasia apane playu na mara, ana aṗure matan poga ga, a pogos laṗasia li na mara la akila kare la m̃a pano-o pe puriula m̃arera re si poli, lavis ga ṗisi. Ana siraunia, apisu ga naṗa apa sina metava, am̃arera manene paṗisi, akila mara amio kiela li na mara na purvanua taṗena la nene, pano-o ataulu la, am̃ene plan la aṗasuṗe sina.

³⁵ Lala ṗas amarmare e pog m̃arera la nene, ana ola la atagin la, ana amilan ga Ntewa mla si ninula pan la sina, pisir plan la amal sina.

La sina ṗasia, nasinekar la akila yepe lalae moki pan la, a akilali la visae la avisave la pe amlelaga re si e Ntewa poli, yoko aligan la awasuṗe la sina. A visae avisave asuṗa amlelaga ke ga e Yesu wa, yoko akila m̃arera la sane van la na wa.

Ana e pogos nene, yeririna lala kiena ne Ntewa asape visae akila m̃arera la ve sanene van la, poga ga, ana taṗatete aligan kiela Suṗe. Asitoṃal ga asape e pogos naṗa visae naga visirplan la sina, la sinelan suṃalen se marana naṗa akekara, a ve amawan re sina.

³⁶ Lala ṗasia apiar la, aṗure la apa am̃e la e yometava e maran yar la naṗa apisa kare la ke paṗisi. La ṗasia, pogos naṗa apiar la, nane e sen urmi lala, akuan la ṗararia e yuṃa na koena.

³⁷ Lala ṗas sina ga, akove moṃar la, la ṗas apiliro

la komþas lua e sowa, þasia atemnar la e playu na mara lala. La naþa visae ve amare re, la mēna ga sur mārera van la pa þisi. Pe kiela sur re poli, limala plas paþisi, þisi na asi plan ga kulus nen nane pona sipsip vena ayenia nakilaen yepela visusun. Sur la punu ga piowa lue ga pan la, a yar taþena lala pe apisuar la re nena ga, akila kare la keviu þisa. ³⁸ Pe mālala uña re poli, a pe kiela yo re naþa ava e poli, þisi na asuñā amialialoro kar ga e yo mema a metava e tavie lala, asu kar ga e pulþe lala.

Nane yar na viawaena lala na sa nene. Yomarava nini na piowa manene la pan la, sa naþa tekilia tevisa tesape yomarava nini pe torokin re si yeririna wo la na sanene ase poli, yar la na sanene popon asuñā ga mālala uña metava ma e peni. ³⁹ Tepisu sane la punu ga naþa tepisayu la pa rui, apane pog mārera la mok paþisi, ana pe amlor re poli, asuñāl mārera ga, kila temnunū kilale kiela naviawaena e Ntewa keviu, a pe lelaga. Ana la ape na pog nane naviranarena marua nanua sumo, ana asuñā amloge navisaarena wo lala kiena ne Ntewa, sane yoko naga kila mrapa naþa akilia atol malena naþa ve uro re, ana pe apisu re mras navisaarena nene molue pula poli. ⁴⁰ Ana Ntewa pisuveve sape popon kila mrapa viu tai van ita. Ana pitetalia Yesu pitom kila pae kiena yuñāena, kila sane la nanua sumo ne, amio ita, ita punu ga towar mras na visaarena kiena ne Ntewa nene e mrapa ve taaga ga, a e pogos taaga ga.

12

Kilamarata sumã ga e Yesu, naña naga m̃arera manene pano taulu pogos m̃arera lala

¹ A la punu naña tepisayu la ãaro rui, la na sane ape pupia purp̃es nen viawaena lala, asa ga pupia p̃egas nena naña asumãl asumã apisuveve ita ke ne, asumã apisu ruru ke kieta viawaena, asape yoko tekirir va ve sanape. Sur ya naña suwo ke kieta mrapa, monar teyaslua, a mlamulen viowa la naña sumã piar kare ita ke ne, monar towarplania, ana tom̃areran kiririen e mrapa piavi naña sike e marata, naña sitomiena na ligana ve su re si e ita, kieta sitomen la ve piayavi ga.

² Tekira tevisuar manene Yesu, naña sumãl sike e luas nen mrapa gare. Naga pe purp̃es nen mrapa na viawaena, a pe kana luas m̃ena ga, ana pogos naña tesitomãlia, yoko la m̃areraena van ita. Tekilia tesitomyu si pogos naña naga ãar ke yepe lalaea a naloge viowaena meta e lak torovia, naga sitom korenan ga pogos m̃arera naña naga panea. Naga mligan kiena sitomena m̃arera su ga e pupia kekarena naña sike e marana, kila m̃a pano-o tauluia, ana nanagane teke e lepasnena ne Ntewa na ãamarua, e pupia lelana wa ma e peni. ³ Popon tesitomyu m̃a Yesu, e pogos naña yeririna viowa la nene akuan make visen viowa la pania, sinela kar manene pañisi, ana naga tam̃an ga naga pano tol luas. Sanene, ita m̃ena popon ve sineta maren re yumãena vilaga, a taãatete temarau, ve tesitom re urmatanen ya naña monar tekila. ⁴ Pona

tesitom ke tesape temloge piowagan kilaen mara temio ðelaga viowa ana torok yo narui, sineta mare, ana pe tetol re ya naða Yesu kila poli wa, pe tesu wo li re mlamulen viowa poli wa, pano-o kata kuruta mlau e yepeta. ⁵ A popon ve sineta ðesan re visena na iilaren naða Arimata Ntewa pisa pan ita, sape pio ita sane narina lala, sape *“Naruu, visae nevisu popon sane naloge viowaena tai imi tol ko, ve ositom korenan re, pona visae yam laðasa nevisu sane monar nela nakoena van ko, kioña sitomena ve lor re, komin kiau ðelaga navian koena naga sanene.*

⁶ *Visae la naða sineu sii la, yam laðasa monar nekila aloge viowa, a la naða nepe Arimala, yam laðasa monar nowela.”* ***Pakaiwa 3:11-12***

⁷ Sanene, visae pog tai ovisu sane ve sanene van ko, monar om̄arera, otam̄an ga sane mrapa ke tai naða Ntewa sinenan sape vian ko e narui, sinenan sape kila ruru kioña malena ne. Ita punu naða tepe ata, tesuña tekila ke sanene pa narita lala, ana visae Ntewa pisu ita sane narina lala, naga monar kila m̄ena ve sa ke nene van ita. ⁸ Sur nene naga yoko ita make tetolia, a visae ve kila re van ita tai, naga pisu yaru nena sane pe pe narin ruru re napo poli, naga pe narin yar nae ga koyo tai. ⁹ A nanua sumo, ita make ga, pogos naða arimata la amla ke nakoena pan ita, pe sinetan re poli, ana pe lelaga, nenaga ne tepisu kilale sane amesmes ga, a kila sane tesitom la va la sane. Ve sanene na, popon manene tewatanon Arimata e ninuta, tekekaran ya naða kila pimi

m̃alivin ita, vanon naga ke nene narui pe mrapa na malena.

¹⁰ Arimata lala amla ke nakoena pan ita e kas la naṣa tepe sisi ke ga wa, akila sanene komin asitom asape yoko wo la sane van la ke sina ga, ana pogos naṣa Ntewa mla nakoena pan ita, kila vena yoko wo ke sina ga van ita, vena ita m̃ena ga tekilia tetol kiena malena wa.

¹¹ Nakoena pe sur tai naṣa e ke e kana pog na kusena, pe kiki re nena ga, melkalka paṣisi. Ana siraunia, visae tetam̃an naga vian ruru kieta malena, yoko war mras napo lala, sane ṣelaga na moṃauena a sum̃arena, amio ṣelaga na waena a na mesmesuena. ¹² Ve sanene, visae sur ya naṣa avitaweia, amiu akilali sane navisawaliena Aisea pisa sumo, naṣa sape

“Avisir plan limamiu la naṣa tayoi sike ne, akila la akulul sina, a purpur na lamiu la naṣa miyuyuwawa ke ne, akila la aṃarera sina.”
Ais 35:3

¹³ Sanene, amiu m̃ena ga akila ruru si kiamiu mrapa la amesmes ruru wo, ana kiamiu laulu la naṣa ayaloro atavevea, yoko lala ve viowa manene re la sane, ana yoko imi m̃arera sina.

Avisuar ruruia ve akila pal re mrapa

¹⁴ Sur lua na waryoen silaga la sanini. Tai, naga ṣelaga na ve erau woena amio yeririna taṣena lala, a ta sina, naga ṣelaga na malena wa naṣa yaru monar se ea visae sinenan sape visu marana ne Ntewa na mava. ¹⁵ Ana monar ayum̃ae m̃arera vena ve amiu yar tai naṣa kirir m̃a pano-o ṣisi ga e mrapa komsusia, naṣa pe tol

re lemamiēna kiena ne Ntewa poli wa. Ovisuar ruru mēna ga naṣa ve narin ṣeligas melkalka ve imi tawa re e sinemā. Visae pere, ṣisi na kapuru war mras la ve moki naṣa piowa e kioṃa malena, a kana kororak ne la ve kila kare re malena wa kiena ne li na lelagaena wa taṣena lala. ¹⁶ Monar ṣelaga viowa na yermēne amio sira ve imi re e amiu, a monar ve ṣelaga nasineṣesan ruruen re Ntewa, sa naṣa Esau kila nanua sumo. Esau nene, Ntewa kilologia naga pe mēaru kiena ne arimana vena kilia war lalimana ve kiena, ana pogos tai naṣa visokaria, mlopon ponos nen pursi wo naṣa wenla na vetokaki Sekop miyūṃaenia, ana mias lua sitomiēna kiena ne Ntewa e kiena malena, pisa pa wenla, pisape “Ei, ola pursi nene im van inu nagane, a lalimana ne ata make ga naṣa pe kiau, ana nela vaniko.” ¹⁷ Ana sa naṣa tekilia ṣa rui, siraunia Esau pisa sape yoko war maran si lalimana ne arimana ve kiena, ana apisalūṣar ga, vanon naga ṣiliwilin plan rui. Ana mloge piowagania, tagi pano-o kila ṣele ga rui. Naga sitom ke sina ga, sape sa ve kila re ga, ana nagane kilalu rui.

Tavie naṣa Sinae na yomarava, amio tavie naṣa Saeon nae peni

¹⁸ Ana popon tesitomli si ve tokak ga e lepas nen navisaluaena na sumo wa, amio lologena wo kiena ne Yesu Kristo naṣa pimi ga na wa. Sur lalua nene pe taṣena paṣisi, ana sur nene tekilia tevisu kilale e kala tavie la lua.

Tavie na navisaluaena marua, nane Tavie Sinae, naña na yomarava ga nini. Kieta li marua le Yu lala akilia apisu e kilamarala, ana apisu sane pe pupia yo wa na marauena, naña kap mēke ea a kana pulḡalu ne lala yo malolo ga rui, amio kan yaku nena naña yemalolo kalo make ga, a lagi tai miyui lue ga ea. ¹⁹ Ana pupia kana kumasua nena miyelyelu m̄alia, ana amloge pulgo tai pis naña urmi paḡisi, kila sane amarau pano-o, atag asape ve visa re si sur tai van la. ²⁰ Apisu sane yo nene pe wa paḡisi, akranwo ruru nena, sane visae sur mal ya naña waro lavisin tavie nene, kus pal laea, yoko monar akoveñaria. ²¹ Ana yermarua Mosis pisu sur la nene, naga m̄ena marau, pisape “Lelaga nañane, nemiyuwawan ga marena.”

²² Naga nene tavie wa na navisaluaena marua na sumo, ana nanagane na pe tepa re si e poli, tepim e tavie wa viu na lologena wo nene na Tavie Saion. Naga sike ma e peni, naña pulkumali kiena ne Ntewa mali m̄eke ea, naga pe Yerusalem viu ne nae yo mava. Naga pulen ga navisi lala, mok na mok naña sane apulopule ga, naña asuvileviles kar ga vena kilaen yauena na kekarena. ²³ Ana likan la, ita ḡegas na li na lelagaena wa la tesike lele taaga ea, naña ita tepe sane m̄earu lala kiena ne Ntewa naña teḡar lalimana. A amio ita m̄ena, ninuna ne kieta yar mare lala asike ea, nane la naña amesmes ruru pa rui e yomarava, ana pogos naña amare, aḡure plan la apa atol luasnen mrapa natamaliaena, naña apa asu ruru e yo nene. A yaru naliḡereena

m̃ena tai totano teke metava e yo nene, naga pe Ntewa na sur make ga. ²⁴ A amio sur wo taṣena la naṣa asike e kieta kunus wa nalologena wo nene, tekilia tevisu Yesu, amio kana kuruta naṣa mlau, naṣa apeven pa e losineta lala vena kila temekiki. Kana kuruta nena, pe sa re kuruta kana ne yermarua Epol nanua poli, naṣa asape kuruta na ween yaru, a kuruta na kilamaranen napiowaena, ana kana ne Yesu naga pe kuruta na tamaliaena yaru, a pe kuruta na viewoena. Yesu kila po paṣisi wa, naṣa suṃal su likan Ntewa amio yaru, kila kiela naviranarena viu lalua suṃalu ruruia, vena kila lalua ave erau wo sina.

Ayagogon ruru pulgona ne Ntewa

²⁵ Navisaluaena marua, naga sane visena na kilaṣegeena ta naṣa paeme e yomarava nini, a lologena wo, naga sane visena na kilaṣegeena ta naṣa pitom ma e peni. Ana la naṣa apilon m̃asila pan navisaluaena marua nene, taṣatete nena aurmatan nakoena ṣisa, ana visae ve sanene, yoko ve sanapen la naṣa apilon m̃asila pan lologena wo? Yoko taṣatete nena aur matan ve tokaki. Visae ve sanene, popon teyagogon ruru pulgona ne Ntewa, telogearia. ²⁶ E pogos naṣa Ntewa pis pa yermarua nasumo la nene, kiena visena urmi paṣisi kila yemninu, ana siraunia, kiena visaaren tai pisa si mon metavania, sape

“Yoko yam si tai nokululun make yo punu ga, ve yomarava re ga nini, a amio make yo la ne ma metava yam veraga.” *Akai 2:6*

²⁷ Visena naþa pisa e nini, naþa sape “Yam si tai,” naga pisa ke sur keviu ta ne. Naga kana kinasa sape Ntewa kululun yo yam tai rui, ana kiena sitomena m̃arera sike ga wa sape kululun li si yam tai ana visu ruru li make ga suria. E legiena maro yoko kululun wowa yomarava nini, amio sur make naþa naga sii la sike ea, ana yoko sur naþa taþatete kululun rovia yoko suñal m̃arera sulue na sike ne. ²⁸ Sur ga tai naga kilia su lue na sike ne sanini, nane nasuþenena kiena ne kieta Ntewa nena, a potena paþisi naþa mligan kieta malena su ruru sike loyuma ea. Popon silaga tekila lotena wo tai vania naþa kilia kekarania, tepisu kilale naþa naga pe na wa paþisi, tewatanonia. ²⁹ Komin kieta Ntewa naga kapi ke nene narui, naþa kilia sikap van make sur punu ga.

13

Pelaga la naþa Ntewa kekarania

¹ Visen si laþas nini vena iila amiuena, naga sanini. Popon asuñã akekarã amiu lue ga, sa naþa kam na ape mratava taaga ga amio Kristo. ² Ana ve akekarã amiu re ga, akekarã ke m̃ena wolawa lala, akekarã naþa avisuar la e m̃amiu uña lala. Popon akilakila sanene, komin pog laþasa, kam na aminue ga, ana wolawa la naþa apisuar la ke ne, la na navisi kiena ne Ntewa ke la narui. ³ Asitoñal la naþa asike e yuñã nakoena, awar pae kiela naloge viowaena lala, sa ga naþa akoven amiu m̃ena apa asike amio la. Kam na ve sinemiu þesan re m̃ena la naþa yar taþena

la asuñña akilakila kare la ke silaga, komin ita punu ga tesike e yomarava nini, a monar tokus pae pogos m̃arera la naña yoko tevisuia.

⁴ Popon yar make ga avisu kilale ðelaga na talopaena naga pe sur wo a pe sur wa m̃ena ga, a komin sur ne nanene, pe pon re si kororak tai imi kila kare tog naña añaenia pe m̃ala lalua naña atalopa, komin lalua apisaaria asape yoko ve aure re si taña. Yoko Ntewa la na lipereena va la naña amiyalyal kar ga, sane li na talopaena naña akila kolau, pona yar viu la naña akila lau.

⁵ Ovisuar ruruia naña ve oligan re kilavaru imi ve suri na sumo e kionña malena. Popon okila ko okekaran ga narin ya naña teke e lumonña rui, komin navisaarena kiena ne Ntewa naña sike pa rui, pisa sanini, sape

“Tañatete neligan ko yam tai, tañatete nevilon m̃asuu van ko.”

Lev 31:6

⁶ Ana pogos naña tesitomyu si naga nene, mla si nam̃areraena pan ita, vena tevisawal visena naña sike e Tus na Yauena lala, pimi pe kieta visena, naña tevisave

“Yar na iila ruru inena, naga Ntewa na mava ga, ana ve nemarau re si narui, yoko yar taña kilia kila si ya ne viowa van inu ne?”

Yauena 118:6

⁷ Sur taña, popon asitom̃alar m̃a kiamiu nasumonena lala, naña apisawal ðesan visena kiena ne Ntewa pan amiu. Avisu veve ruru mras naña molue kome ðelaga wo na kiela malena, a akila ga nono na kiela lelagaena m̃arera e kiamiu malena lala. ⁸ La amlelaga ruru po, ana ita m̃ena tekilia telelaga, komin Suñe Yesu Kristo

naga piloulou re pogos tai poli, naga maran taaga sa ke nakoneva, ãane, a peni, sulue na sike ne.

⁹ Popon tevisa m̃ena tevisave avisuar ruru amiun visena kar taãena lala amio navian wowenen lala ve aim aure plan amiu re vetan kove wo naãa kam na asike pae rui. Yar laãasa asitom manene la e ãaãagena wa lala, amio kala kinanena ne lala, ana kinanena la nene taãatete nena iila kiela malena lala. Sur taaga ga naãa kilia kila sineta la m̃arera ruruia, nane lemamiena kiena ne Ntewa pimi pan ita. ¹⁰ Kinanen la ne tai ne sanene, naga nane kilam̃iu na kuãaãaena lala naãa yaru wa la akuan ke e wonta. Amlenwoia, akila pa yum̃aena la e narui, ana siraunia akania sa naãa akinan kala ke narui. Yar wa la nene la amal ga e kinanena na wonta la nene, ana ita naãa temlelaga e Yesu, ita na pe tekinan re e wonta nene poli, ita na kata wonta taãena m̃eke na, naãa temal e kana kuãaãaena nena naãa akuan su ea, naãa yar wa la pe apisu kilale re poli, a la taãatete akinana ea.

¹¹ La asum̃a akila ke kiela kuãaãaena la nene, ana tai na pe taãena towe laa sane, sa naãa asape kila totou na marena kiena ne Yesu, kuãaãaena nena naga naãa asape na lakorenanena na viewoen mlamulen viowa, ana pogos naãa ãarin yar wa kila naga, naga pe kus make re tas nen sur mal pa loyum̃a naãa pe yo wa manene poli, ana ãar ga kana kuruta, pa mligan se wonta. Ana tas nen sur mal nena, akuslua si petan um̃a, akus pa vanua, ana askapia.

¹² Naga sa nenaga naãa Yesu kila, naãa akus

m̃ena naga pa vanua e purkove na pulkumali, akila mloge m̃a piowa pano-o kana kuruta mlau make nenaga, naṣa pe mlau koren re poli, ana mlaun naṣa kila ita kiena yeririna lala tepim tepe yar wa ruru nena napo lala e marana ne Ntewa. ¹³ Ana komin naṣa Yesu kekaran sape kila ve sa nene vanon ita, ita m̃ena ga monar tekekaran teva tesuñal tesu temio naga vanua e um̃a, yar la avisu kare ita sa naṣa apisu kare naga, tokus naloge viowaena ve sa ke ga naṣa naga kusa. ¹⁴ Visae viowa ga van ita e yomarava nini sanene, sanene na pogaga ne, komin naṣa pe tesitom re tesape yoko tesike e pulkumali tai e nini ana tesulue poli, ana temligan kieta sitomena sike ga e m̃ata um̃a napo e pulkumali viu naṣa tepanon ke rui.

¹⁵ Popon kemua tesitomañal lue ga naṣa Yesu kila po manene la pan ita, naga pietavan ita e mrapa rui ana silaga tekilia tevisa potena va Ntewa vanonia. Ve tekila re kuṣaṣaena e sur mal la vania, ana nalaena tai toñã ga naṣa tekilia tela luen ga van silaga, naṣa yoko kekaran vaṣisi, naga nalaena na yeluarena. Tesuñã tepisirlua ke kiena kia sanene, ana visena na gota ne lala sa ga mralak tai naṣa kiki ruru nena po pania. ¹⁶ Visae sanene, ve sineta ṣesan re naṣa tekila yuñãena wo lala, komin naga sane kuṣaṣaena naṣa tekilia tela va Ntewa. Tai naṣa naga kekaran manene la sane, naga sanini, sape tekila luen ga wo va yar taṣaena lala, tekekaran ga naṣa teviovion kieta sur la temio la.

¹⁷ Sur si laṣasa, sane monar telogear kieta nasumonena lala, monar tekekaran ga naṣa

tesu vatanon kiela visena lala. La aŝion ke paŝisi naŝa avisuar ruru ita, komin naŝa pupia yerkawa kerkeviu la naŝa asu metavan la asuŝa apisu veve ke kiela yuŝaena a kiela ŝelaga ŝena lala. Visae kieta nasumonena lala, kiela sitomena la marmare, ana yoko yuŝaen make ga va viowa nenaga, ana visae telogear ruru la wo, yoko kila yuŝaena ve urmi manene re van la, akekarania, ana yoko wo manene ŝena van ita, yar na yuŝaena lala.

¹⁸ Pogaga, lavis ke visena make la ŝisŝis narui, ana sinemimin mesape meviun ŝena tan amiu mesape asitoŝal imimi e kiamiu leniena lala, vanon yom̄arera naŝa mesike e nanagane. Pe mepisu re sur tai piowa teke e imimi poli, ki-amimi sitomena la merarava ruru ga, a mesuŝa mesuŝalu ŝarera lue ga mesike e ŝelaga wo la naŝa mesmesu e maran yar lala.

¹⁹ Ana sineun nesape visena la nene akila ruru vilaga, vena nekilia neviaŝa e nini ve ve piavi re nowasuŝe si neiŝas pun amiu. ²⁰ In na nesuŝa nemlen wo amiu ke ŝena ga, nesape yoko Ntewa iila amiu. Naga pe Ntewa na suŝare, naga pe Ntewa naŝa sinena miye ita kiena sipsip lala, ana pitetalia kieta Suŝe Yesu pitom e yomarava nini, pitom pe yerkawa na visuaren kieta sipsip lala, kana kuruta mlau vena visirluaen naviranarena viu naŝa yoko sike sike nena. Naga pe Ntewa ŝena naŝa Yesu taŝan kiena malena pania, ana naga ŝerelua petan marena, pisirlua malia sina, ²¹ ana noŝasine naga nesape yoko la sur nowo make ga naŝa kam na sinemiun ke nanagane vena kilaen kiena yuŝaena e yomarava nini sa

naña sinenania. Naga sumña miyuñae ke e kieta malena la pe ve taaga, komin Yesu Kristo sumña miyuñaen ke kieta þelaga wo vim ve sa naña naga sinenania, ana yoko teieluar manene naga vanon vano-o taþatete þisi, Sanene.

²² Na mratava pun inu lala e Kristo, nesiri mñaki nini piñasu pan amiu, pona visae ve ve piavi manene re yo, ana visae avisu ve sanape kam na ve sinemiu karin re, ana kam na ala kiau visena na iilaen la naña sike ea.

²³ Sineun nesape nevisawal van amiu aloge kieta wolai naña Timote, amligan lua si naga molue petan yuñã nakoarena rui. Visae ve ve piavi re imi kom e nini, yoko imimi lua, meimñas mevisuveve amiu.

²⁴ Sinemimin mesape avisawal va kiamiu nasumonena lala, amio mñena yeririna taþena lala kiena ne Ntewa, avisave mepiun ke mesape la asike sanape, asururuga pona sanape? A le Italia la naña asike e nini la mñena sinelan asape avisa pokolemalo van amiu. ²⁵ Kiau visena maro nae e nini, nane nesiri van amiu narui, nesape yoko lemamiena wo a sinewo kiena ne Ntewa sike amio amiu make ga.

**Lologena Wo Kienane Yesu Kristo Kome
Kewo
The New Testament in the Lewo Language of Epi
Island, Vanuatu
Le Nouveau Testament en Lewo langue de l'île d'Épi
au Vanuatu — Niutestamen long Lewo lanwis, blong
Epi Aelan, Vanuatu**

copyright © 2016 Wycliffe Bible Translators, Inc.

Language: Lewo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 3 Mar 2023 from source files dated 22 Nov 2019

ee028e1c-7e53-571d-8041-681daaf580e8